

la alis. cizra je cinri zunkte vi le selmacygu'e

la lojbangirz. .e la'o gy. Lewis Carroll gy.

This work, in all forms, is explicitly placed in the public domain.
dei poi selcku ku'o petai roda cu selxu'a selpu'i fi le'i gubni selpo'e

Table of Contents

1	le fukpi	1
2	pamo'o mo'ini'a le ractu kevna	3
3	remo'o le se klaku lalxu	7
4	cimo'o [A Caucus-Race and a Long Tale] ...	11
5	vomo'o le ractu cu benji lo cmalu me la bil..	15
6	mumo'o se djusku le ciftoldi	19
7	xamo'o [Pig And Pepper]	25
8	zemo'o fenki tcati te salci	31
9	bimo'o [noltruni'u kelcrkroke bo foldi]	37
10	somo'o lisri fi la jitfa cakyrespa	43
11	panomo'o xasyjukni vonseldansu	49
12	papamo'o ma zerle'a lei rutytisna	55
13	paremo'o le sidydatni po'e la alis.	59

1 le fukpi

2 pamo'o mo'ini'a le ractu kevna

la alis co'a tatpi le nu zutse le rirxe korbi re'o le mensi gi'e zukte fi noda i abuboi paji'ireroi sutra zgana le cukta poi le mensi cu tcidu i ku'i cy vasru no pixra ja nuncasnu i lu ji'a ma prali sei la alis pensi fi lo cukta poi vasru no pixra ja nuncasnu li'u

i abu ca'o jdice ga'a le abu menli to serai le kamza'a verai lei selka'e va'o le nu le glare djedi cu rinka le nu abu lifri le nu sipseltri je bebna toi le du'u xukau le nu pluka fa le nu zbasu lo xrula linsi cu se vamji le raktu po'u le nu sa'irbi'o gi'e crepu lei xrula icabo suksa fa le nu lo blabi ractu poi xunblabi se kanla cu bajra zo'a abu

i la'e di'u no'e ba'e mutce le ka cizra ijenaiji'a la alis jinvi le du'u ba'e mutce le ka nalfadni kei fa le nu tirna le nu le ractu cu sezysku lu oiro'a oiro'a mi lerci li'u to baku ca le nu abu pensi la'e di'u kei abu ri te sidbo le du'u ei ri abu cizra i ku'i caku piro ri simlu le ka rarna toi i ku'i ca le nu le ractu ca'a lebna lo junla le kosta daski gi'e catlu jy gi'e di'a sutra kei la alis spaji sa'irbi'o ki'u le nu lindi pagre le abu menli fa le si'o abu pu noroi viska lo ractu poi ponse lo kosta daski a lo junla poi ry ke'a dy ka'e lebna i bai le nu kucli kei abu bajra pagre le foldi gi'e jersi ry gi'e u'adai viska le nu ry canci mo'ine'i lo barda ke ractu kevna noi cnita le spabi'u

i baziku la alis mo'ine'i jersi ry gi'e noroi pensi le du'u ta'i ba'e makau abu ba za'ure'u bartu

i le ractu kevna cu ve'a tubnu sirji gi'e suksa nitsalpo li sono i tai suksa ja'e le nu la alis na zifre le nu ze'iji'asai pensi le nu sezydicra kei pu le nu abu ca'o farlu fo lo condi mutce jinto

i ga le jinto cu mutce le ka condi gi abu mutce le ka masno le nu farlu i ni'ibo le temci cu mutce banzu ca le nu farlu kei le nu catlu le sruri gi'e kucli le du'u makau bazi fasnu i pamai abu troci le nu catlu le cnita gi'e facki le du'u abu makau klama i ku'i dukse le ka manku kei le nu ka'e viska i remai abu catlu lei mlana be le jinto gi'e facki le du'u my culno loi kabri tanxe ku joi loi cukta kajna i abu viska loi cartu ku joi loi pixra vu'o noi dandu loi genxu i abu lebna lo botpi pa le kajna ca le nu lampagre i by se tcita lu najnimre tityjdu li'u gi'e ku'i u'anaidai kunti i abu na djica le nu falcru le botpi mu'i le nu terpa le nu catra da iseki'ubo abu suksa le nu punji by pa le kabri tanxe ca le nu abu ty farlu lampagre

i lu uo sei la alis pensi ba lo nu farlu tai ti kei mi na ba xanka le nu farlu fo le serti i lu ua virnu sei le lanzu tu'a mi ba jinvi li'u i u'o mi noda cusku va'o ji'asai le nu mi farlu fi le drudi be le zdani tosa'a la'e di'u la'a jetnu toi li'u

i mo'ini'a mo'ini'a mo'ini'a i xu le nu farlu cu noroi mulno i lu mi kucli le du'u mi ca minli li xokau le ni farlu sei abu cladu cusku i ia mi pu'o jibni le midju be le terdi i ka'u minli li voki'o le ni cnita tosa'a la alis pu cilre so'o da la'e di'u le ckule i zu'u le cabna na matrai le nu jarco le ka djuno kei kei ki'u le nu noda abu tirna i zu'unai le nu rapsku cu xamgu abu le nu crebi'o toi i go'i i le se minli cu jibni drani i ku'i mi kucli le du'u makau ti stuzrlatitudi gi'e stuzrlongitudi li'u i to la alis nasai djuno le du'u makau smuni ga zo stuzrlatitudi gi zo stuzrlongitudi i ku'i abu jinvi le du'u melbi je banli valsi toi

i caku abuboi za'ure'u co'a co'e i lu mi kucli le du'u xukau mi ba farlu ba'e pagre le terdi i u'isai tolcanci le jbini be lei prenu poi cadzu fau le nu le stedu cu cnita i pe'i bu'u le smudukti tosa'a caku abu gleki le nu noda tirna kei ki'u le nu le valsi nasai drani sance toi i ku'i ei mi te preti le cmene be le gugde le du'u mokau i lu pe'u doi ninmu ti nuzlo gi'i sralo tosa'a abu troci le nu krorinsa kei ca le nu tavla i ko se xanri le nu krorinsa ca le nu

farlu i pe'ipei do ka'e snada toi i ny ba jinvi le du'u mi toldjuno ke cmalu nixli kei fo le nu mi te preti i ei mi na te preti i ju'ocu'i mi viska le nu ba'o ciska le cmene da li'u

i mo'ini'a mo'ini'a mo'ini'a i no drata be la'e di'e ka'e se zukte iseki'ubo la alis za'ure'u co'a tavla i lu ju'o la dinas ba mutce le ka se claxu mi kei ca le cabnicte tosa'a la dinas cu mlatu toi i a'o da ba morji tu'a le dy ladru palna ca le sanmi tcika i doi dinas noi dirba mi do'u au do mi kansa le cnita i u'u no smacu cu zvati le vacri i ku'i da'ibi'unai do ka'e kavbu lo volratcu noi ka'u mutce le ka simsa lo'e smacu i ku'i a'u xu lo'e mlatu cu citka lo'e volratcu li'u i caku la alis co'a sipydji lifri gi'e di'a senva sezysku lu xu lo'e mlatu cu citka lo'e volratcu i xu lo'e mlatu cu citka lo'e volratcu li'u esu'oroibo lu xu lo'e volratcu cu citka lo'e mlatu li'u iseja'ebo na vajni mutce fa le du'u porsu makau ki'u le nu abu ka'e spuda no le re preti i abu lifri le nu pu'o sipna kei gi'e puzi co'a senva le nu abu xanjaisi'u cadzu kansa la dinas gi'e cusku lu ju'i doi dinas ko mi jungau le jetnu i xu do su'oroibo citka lo volratcu li'u ca le nu sukxa fa le nu abu le cpana be lo derxi be loi grana ku joi loi sudga pezli mo'u farlu

i la alis nasai se xrani gi'e zi sanli fi le jamfu gi'e catlu le gapru noi ku'i manku mulno i crane abu fa lo drata ke clani vorme i le blabi ractu cu za'o se viska gi'e sutra le nu litru vy i ei la alis na denpa i abu klama tai tu'a le brife gi'e ja'aru'e snada le nu tirna le nu ry cusku lu oi doi le mi kerlo joi zbikre do'u ca'o co'a lerci li'u i abu jibni trixe ry ca le nu pagre le kojna iku'i ry ca na za'o se viska i abu facki le du'u abu zvati lo clani je dziselдру kumfa noi se gusni fi lo se linji noi dandu le drudi

i so'i vorme cu sruri le kumfa i ku'i ro vy cu stela ganlo i ca le nu la alis ba'o litru le pamoi mlana e le drata gi'e troci tu'a ro vorme kei abu badri cadzu bu'u le midju gi'e kucli le du'u ta'i makau abu ba za'ure'u bartu

ibaziku abu penmi lo cmalu ke cibyseltuple jubme be lo sligu blaci i cpana jy fa po'o lo cmatce ke solji ckiku i abuboi pamoi jinvi le du'u cy ckiku pa le stela be lo kumfa vorme i ku'i uinaidai ga le stela cu dukse le ka barda gi le ckiku cu dukse le ka cmalu iseju cy ka'e kargau noboi sy i ku'i ca le remoi abu penmi lo dizlo murta noi abu na pu sanji ke'a i my murta lo cmalu vorme noi mitre li ji'ipivo i abu troci le nu co'e le cmalu ke solji ckiku le stela i uisaidai mapti

i la alis kargau le vrogai gi'e facki le du'u vy se jersi lo cmalu vorme noi na bramau lo ratcu kevna i abu cidni sanli gi'e catlu le se vorme noi traji le ka melbi lei purdi poi ze'e se viska i a'osaidai abu barkla le manku kumfa gi'e cadzu jbini lei va zdani be loi carmi xrula be'o ku joi lei va lenku jinto i ku'i abu na ka'e gregau le ji'asai stedu le vorme i lu va'o ji'asai le nu le mi stedu ka'e pagre kei sei la alis uu pensi sy tolmutce le ka se pilno secuu lei mi janco i au mi ka'e se polje tai tu'a le'e darvistci i pe'i mi ka'e go'i va'o le nu mi djuno le du'u mi co'a go'i ta'i makau li'u i lei puzi nalfadni fasnu tai so'imoi ja'e le nu la alis co'a jinvi le du'u so'usai da ca'a nalcumki

i ru'adai na prali fa le nu denpa fi le cmalu vorme iseki'ubo abu xruti le jubme gi'e xadba pacna le nu abu facki le du'u lo drata ckiku jy cpana kei a do'anai tu'a lo cukta co javni be le nu ta'i makau polje lo prenu tai tu'a le'e darvistci i ca le ca krefu abu facki le du'u cpana jy fa lo cmalu botpi to lu noi ju'o na pu zvati ti sei la alis cusku li'u toi i sruri le botpi cnebo fa lo pelji tcita noi lei valsi po'u lu ko mi pinxe li'u cu melbi prina ke'a sepi'o loi barda lerfu

i xamgu fa le nu cusku lu ko mi pinxe li'u i ku'i la alis noi prijje na bazi zukte la'e di'u i lu na go'i i pamai mi catlu sei abu cusku gi'e facki le du'u xukau da sinxa zo vindu li'u i

abu pu tcidu so'o melbi ke cmalu lisri be loi verba poi jelca se xrani gi'e se citka loi cilce danlu gi'e lifri loi drata tolpluka ki'u le nu na morji lei sampu jivni poi lei pendo cu ctuca ku'o no'u mu'a le nu lo'e xunre glare tunta cu jelca xrani lo'e za'o jgari be ty zi'e no'u mu'a le nu va'o lo'e nu condi mutce sraku le degji sepi'o lo dakfu kei dy ta'e ciblu cirko i abuboi noroi tolmorji le du'u le nu da dukse le ka pinxe lo se botpi be le se tcita be zo vindu bazi ja bazu fanza da

i ku'i le vi botpi na se tcita zo vindu iseki'ubo la alis darsi le nu vu'irga'e le selvau kei gi'e facki le nu sy pluka to je'u sy vrusi lo mixre be lo rutrceraso tisna ku joi lo sovykruji ku joi lo grutrxfanase kujoi lo seljukpa xukre'u ku joi lo satmatne ku joi lo glare ke matne jelnanba

```

*      *      *      *      *      *      *
  *    *      *      *      *      *      *
*      *      *      *      *      *      *

```

i lu ue cizra selga'e sei la alis cusku i ru'a ju'o mi se polje tai tu'a le'e darvisteci li'u

i ca'a co'e i caku abu cenmitre li so'u remu i le abu flira cu cambi'o seja'e le nu pensi le nu caku abu mapti le cmalu vorme le ka pagre fi le melbi purdi i ku'i pamai abu denpa le nu zgana le du'u xukau abu za'o brajdika i abu milxe le ka xanka la'e di'u i lu cumki fa le nu se fanmo sei la alis sezysku le nu mi mo'u canci tai tu'a lo lakyga'a fagri i mi kucli le du'u mi makau simsa va'o da'i la'e di'u li'u i abu troci le nu se xanri le du'u lo lakyga'a fagri makau simsa ba le nu le lakyga'a cu se gusydicra i abu ka'enai morji lo nu viska lo tai dacti

i bazaku abu ca le nu facki le du'u no drata cu fasnu cu jdice le nu zi klama le purdi i ku'i la alis uu ca le nu tolcliva le vorme cu facki le du'u abu tolmorji tu'a le cmalu ke solji ckiku i ca le nu ba'o xruti le jubme tezu'e le nu cpacu cy cu facki le du'u le ni abu galtu na banzu le nu cpacu cy i abu traji troci le nu cpare pa le tuple be le jubme i ku'i ty dukse le ka se sakli i abu uu ca le nu tatpi le nu troci cu zutse gi'e klaku

i lu e'e noda do prali le nu tai klaku sei la alis kinli sezysku i e'u ko cazi sisti li'u i abu ta'e sezystidi lo xamgu mutce to ku'i ta'enai mapti zunkte toi gi'e su'oroi tai junri sezytolzarsku ja'e le nu gasnu le nu le se klaku cu zvati le kanla i abu morji le nu paroi troci le nu darxi le abu kerlo kei mu'i le nu abu abu tcica ca lo nu abu abu fapro le nu kelckroke i le vi cizra verba cu mutce le ka nelci le nu sruma le du'u du re prenu i lu ku'i noda mi ca prali sei la alis uu pensi le nu sruma le du'u mi du re prenu i oi le mi ve vimcu na banzu le nu marji fi ba'e pa se sinma prenu li'u

i bazi le nu abu catlu cu se farna lo cmalu ke blaci tanxe noi cnita le jubme i abu kargau ty gi'e facki le du'u nenri ty fa lo cmalu mutce titnanba noi bu'u ke'a lei valsi po'u lu ko mi citka li'u se morna loi sudgrute i lu ai mi ti citka sei la alis cusku i va'o da'i le nu gau ti mi braze'a kei mi snada le nu cpacu le ckiku i va'o da'i le nu gau ti mi cmaze'a kei mi kakne le nu reskla ni'a le vrogai i seki'ubo va'o le re fasnu kei mi ka'e klama le purdi i mi na se vajni le du'u le mokau cu fasnu li'u

i abu citka lo spisa gi'e xanka sezysku lu fa'a ma i fa'a ma li'u gi'e punji le xance le cpana be le stedu tezu'e le nu ganse le nu sy banro fa'a makau i abu mutce le ka spaji le nu facki le du'u abu stali le nu barda mintu i li'a la'edi'u ta'e fasnu ca lo'e nu citka lo titnanba i ku'i la alis tai se tcaci le nu ba'a no na'e tolfadni cu fasnu kei ja'e le nu simlu le ka toldzile gi'e bebna kei fa le nu le nunjmive cu ca'o fadni

i abu co'a co'e gi'e bazi mo'u citka le titnanba

```
*      *      *      *      *      *      *
 *     *     *     *     *     *     *
*      *      *      *      *      *      *
```

3 remo'o le se klaku lalxu

le se klaku lalxu

i lu cizy ze'a cizyze'a sei la alis krixax to abu tai se spaji ja'e le nu ze'a tolmorji le nu ta'i makau tavla bau le drani lojbo toi i caku mi se tolplo tai tu'a le'e brarai darvistci i co'o jamfu to ca le nu abu catlu lei abu jamfu kei jy simlu le ka jibni le ka na ka'e se viska kei kei ki'u le nu ca'o binxo lo tai darno toi i uu doi cmalu jamfu ma do ba dasygau lei do cutci ku joi lei do smoka doi dirba i ju'o mi ba na ka'e go'i i mi ba mutce dukse le ka darno do kei le nu kurji do i ko renvi ta'i le do xagrai selka'e i ku'i ei mi jy xendo sei la alis pensi i va'o da'i na'ebo la'e di'u ju'ocu'i jy na cadzu veka'a le mi se djica i ua ai mi dunda ca ro cevjbetersla lo cnino cutci remei li'u

i abu ca'o platu le nu co'e ta'i makau i lu ei lei cutci cu se mrilu sei abu pensi i ba xajmi fa le nu benji loi seldu'a le vo'a jamfu i ua le judri ba simlu le ka cizra i

le selsi'a ke pritu jamfu be la alis
bu'u la fagzda lolgai
ne'a le fagzu'i
to la alis prami benji toi

i ue mi bebna tavla li'u

i caku le abu stedu cu janli le drudi be le kumfa i je'u abu ca mitre za'u li repimu i abu ze'i lebna le cmalu ke solji ckiku gi'e sutra klama le purdi vorme

i la alis uu zo'u le nu mlana vreta gi'e catlu le purdi sepi'o pa kanla cu jimte lei se zukte le ka abu kakne ce'u i le nu pagre cu nalcumki traji i abu zutse gi'e za'ure'u co'a klaku

i lu ei do ckeji sei la alis cusku i do barda nixli to'i ju'o drani toi i i'enai ca'o tai klaku i le'o ko ca sisti li'u i ku'i abu za'o klaku loi litce be li so'i ja'e le nu abu se sruri lo barda lalxu noi centre li ji'ipano le ka condi kei gi'e preja le xadba be le kumfa

i bazaku abu tirna lo nu cmalu stapa le darno kei gi'e sutra le nu sudgau lei kanla tezu'e le nu viska le nu makau klama i klama fa le blabi ractu noi xruti gi'e melbi dasni gi'e jgari lo blabi ke kanba gluta remei ku fa'u lo barda bifpra le re xance i ry sutra bajra klama gi'e sezysku lu oi le noltroni'u zo'u ba'a ny ba cilce fengu va'o le nu mi gasnu le nu ny denpa li'u i la alis tai cinmo le nu tolpacna kei ja'e le nu roda zo'u abu bredi le nu cpedu lo'e nunsidju da iseki'ubo ca le nu le ractu abu jibni kei abu co'a co'e sepi'o lo lauble je toldarsi voksa lu pe'u doi ractu li'u i le ractu cu sukxa se jenca gi'e falceru lei blabi ke kanba gluta e le bifpra gi'e bajra mo'ine'i le manku serai le ka sutra

i la alis cu lebna le bifpra e lei gluta gi'e co'a pilno by ki'u le nu le kumfa cu glare kei ze'a le nu ca'o cusku lu oi ue roda cizra ca le cabdei i ca le purlamdei roda fadni fasnu i mi kucli le du'u xukau da galfi mi ca le nicti i ei mi pensi i xu mi mi mintu ca le nu mi cikna binxo ca le zi cerni i pe'iru'e ba'anai mi cinmo le nu mi frica milxe i ku'i va'o le nu mi mi na mintu kei jersi preti fa le du'u mi du makau i la'e di'u cu barda nabmi li'u i abu co'a pensi ro le verba poi ke'a abu slabu gi'e mintu le ka nanca ku'o tezu'e le nu jdice le du'u xukau cumki fa le nu ba'o galfi abu su'o vy

i lu ju'o mi na du la adas sei abu cusku ki'u le nu ge le abu kerfa cu clani sarlu gi le memimoi cu nasai sarlu i ji'a ju'o mi na du la mabel ki'u le nu ge mi djuno so'i vrici gi my y djuno lo tolmutce i ji'a ge my du my gi mi du mi i oi ue roda cfipu i mi mi cipygau le ka ca djuno roda poi mi pu djuno i pilji li vo li mu fa li pare i pilji li vo li xa fa li paci i pilji li vo li ze i oi mi ba noroi snada tu'a li reno va'o le nu tai masno i ku'i le pilji porsi na vajni i

e'u troci tu'a le tedyske i la londn raltca la paris i la paris raltca la romas i la romas sa la'e di'u naldrani ju'o i ju'o pu galfi mi la mabel i mi troci le nu cusku lu ua le cmalu li'u li'u i abu punji lei kruca xance lei tuple tai lo'e nu cusku lo se cilre kei gi'e co'a sitsku i ku'i le voksa cu se sance lo rufsu je cizra i lei valsi na mintu le se tcaci

i ua le cmalu krokodilo
 cu zengau le ky rebla
 si'u le djacu pe la nilos
 le ka camri'ojvebla

i ua lei jgalu ja'a tinsa
 je cnici preja panra
 i lei cmafi'e cu se rinsa
 le cisma xedja ganra

i lu ju'o lei valsi na drani sei la alis uu cusku li'u i lei abu kanla cu za'ure'u tisna loi se klaku ca le nu di'a co'e lu ja'o mi du la mabel i mi ba bilga le nu xabju le pindi ke cmalu zdani gi'e ponse ji'ino selkei gi'e oi cilre so'isai da i ai na go'i i mi mu'o jdice fi la'e di'u fe le du'u mi ganai du la mabel gi stali ti i noda de ba prali le nu de setca le de stedu ti gi'e cusku lu ko barkla doi dirba li'u i mi ba fa'aga'u catlu gi'e cusku lu ja'o mi ma du i pamai ko mi jungau la'e di'u ibabo va'o le nu mi nelci le nu mi makau du keikei mi barkla i va'o le nu mi na nelci kei mi ti denpa le nu mi drata li'u i ku'i oi sei la alis sukxa klaku krica i au su'o da ca'a setca le da stedu ti i mi tai titpa le nu mi ti nonkansa li'u

i ca le nu cusku di'u kei abu fa'ani'a catlu le abu xance gi'e se spaji le nu viska le nu abu co'a dasni pa le cmalu ke blabi ke kanba gluta pe le ractu ze'a le nu tavla i lu mi kakne la'e di'u ma sei abu pensi i ja'o mi za'ure'u jdika le ka barda li'u i abu sa'irbi'o gi'e klama le jubme tezu'e le nu sezmerli fi jy kei gi'e facki le du'u za'a abu ca centre li ji'imuno gi'e sutra le nu ca'o jdika i abu bazi facki le du'u rinka la'e di'u fa le nu jgari le bifpra kei kei gi'e sutra falcru by puzi le nu mu'osai jdika

i lu jibni rivbi sei la alis noi tolmilxe le ka terpa le nu sukxa cenba kei kei gi'e ku'i mutce le ka gleki le nu abu ca'o zasti cu cusku i e'e caku klama le purdi li'u i abu bajra serai le ka sutra kei fa'a le cmalu vorme i ku'i oidai le cmalu vorme cu za'ure'u ganlo i le cmalu ke solji ckiku cu vreta le blaci jubme tai le purci i lu le tcini roda xlamau sei le se kecti verba cu pensi iki'ubo mi noroi pu cmalu tai ti i noroi i ju'a ty mutce le ka xlali je'u li'u

i ca le nu abu cusku lei di'u valsi kei le abu jamfu cu sakli ibazibo lo nu jaurjanli zo'u le jmaji'o bi'i le firji'o be abu cu jinru lo silna djacu i pamoi sidbo fa le nu abu ba'o farlu le xamsi i lu va'o la'e di'u mi ka'e xrukla fu le trene sei abu sezysku li'u to la alis pu klama le xamsi korbi paroi le nunjmive gi'eja'ebo jinvi le du'u ro pagbu be le glico korbi cu se zvati so'o jinru minji noi nenri le xamsi ku'o e so'o verba noi kakpa lo canre le loldi lo mudri canpa ku'o e lo porsu be fi loi ginka be'o e lo trene tcana noi trixe py toi i ku'i bazi abu sanji le nu abu jinru le lalxu pe lei abu se klaku be ca le nu mitre li repimu

i lu au mi na pu klaku lo tai mutce sei la alis ca le nu limna gi'e troci le nu tolcri lo bartu pluta cu cusku i ru'a sfa mi la'e di'u le nu mrobi'o jinru lei mi se klaku i ju'o la'e di'u ba cizra i ku'i roda cizra ca le cabdei li'u

i caku abu tirna le nu da jaurjanli bu'u le lalxu zaku i abu jbize'a limna tezu'e le nu zgana le nu da mokau i pamai abu jinvi le du'u da odbenu ja rirxyirma i ku'i remai abu

morji le nu abu makau ca mitre kei gi'e bazi viska le nu da smacu po'o gi'e mintu abu le ka pu sakli

i lu xu da mi prali sei la alis pensi le nu tavla le vi smacu i roda bu'u le cnita cu tai tolfadni ja'e le nu pe'i lakne fa le nu ta ka'e tavla iseju noda mi tolprali le nu troci li'u iseki'ubo abu co'a co'e lu doi smacu xu do se slabu le pluta be le bartu be le bu'u lalxu i mi mutce le ka tatpi le nu ru'u limna doi smacu li'u to la alis pu jinvi le du'u ju'o ta drani le ka tadji lo'e nu tavla lo smacu i abu noroi pu zukte lo simsa gi'eku'i morji le nu tcidu fi le latmo gerna cukta pe le bruna fe lo'u lo smacu – sera'a lo smacu – seka'a lo smacu – ri'i lo smacu – doi smacu le'u i le smacu cu terpreti mutce catlu abu gi'e simlu le ka rinsa fi le nu ze'i ga'orgau pa le cmalu kanla i ku'i sy cusku noda

i cumki fa le nu ta na se bangu le lojbo sei la alis pensi i ru'a ta fraso smacu gi'e kansa la uiliam no'u le jamji'a le ka klama ti li'u to abu djuno piso'ida lei purcedra gi'eku'i na mutce le ka jimpe le du'u py pu fasnu za makau toi i abuboi za'ure'u co'a co'e zoi fy O est ma chatte? fy noi pamoi lei jufra pe le abu fraso ve cilre cukta i le smacu cu suksa plipe le bartu be le djacu gi'e simlu le ka desku le nu terpa i lu oise'i ko mi fraxu sei la alis noi xersmadi le du'u abu crogau le danlu le cnirango cu sutra krixaxa i mi mulno le ka tolmorji le nu do na nelci lo'e mlatu li'u

i lu na nelci lo'e mlatu sei le smacu cu kinli je cinmo voksa krixaxa i xu ba'e do nelci lo'e mlatu va'o le nu da'i do me mi li'u

i lu y la'anai sei la alis surgau tonga cusku i ko na fengu i ku'i au mi ka'e jarco le mi'a mlatu no'u la dinas do i pe'i do co'a nelci lo'e mlatu va'o le nu da'i do dy viska i dy tai dirba smaji sei la alis tecu'uru'e le sevzi ca le nu lazni limna le lalxu ca'o co'e i dy melbi cmoni zutse ne'a le fagri gi'e tacpe'u le dy xance gi'e lumci le dy flira i dy tai pluka ranti le nu kujyjai i dy tai certu le nu kavbu lo'e smacu i oise'i ko mi fraxu sei la alis noi birti le du'u le smacu noi caku tinsa cu je'u cnicro cu za'ure'u krixaxa i mi'o dy na ba di'a casnu va'o le nu do zmanei li'u

i lu zo mi'o ue sei le smacu noi da bi'i le jipno be le ke'a rebla cu desku cu krixaxa i ju'onacai mi casnu lo simsa i le mi lanzu ze'e xebni lo'e mlatu i rigni je tolba'i je malfadni danlu i e'u mi na za'ure'u tirna le cmene li'u

i lu vi'osai sei la alis noi sutra le nu galfi le selsnu cu cusku i xu y xu do y nelci y lo'e gerku li'u i le smacu na spuda iseki'ubo la alis ca'o co'e lu lo melbi ke cmalu gerku noi xabju le jibni be le mi'a zdani zo'u mi djica le nu mi gy do jarco i gy cmalu gerku la terier gi'e se kerfa lo clani je sarlu je bunre gi'e xrubei lei dacti poi do renro i gy fa'aga'u zutse gi'e cpedu le sanmi gi'e zukte so'i vrici noi mi ka'enai morji pimu lu'o ke'a i gy se ponse lo te cange noi xusra le du'u gy tai se pilno ja'e le nu gy se vamji lo rupnu be li panono i cy xusra le du'u gy catra ro le ratcu i oise'i sei la alis xenru tonga krixaxa i mi xersmadi le du'u mi ta za'ure'u cnixai li'u i le smacu ca'o limna to'o abu serai le ka vlipa kei gi'e mutce le ka kalsygau le lalxu ca le nu klama

i abu xutla trisku lu doi smacu dirba ko za'ure'u xruti i nu'edo'u mi'o ba casnu genai lo'e mlatu ginaiji'a lo'e gerku va'o le nu do na nelci li'u i ca le nu le smacu di'u tirna kei sy dutsel'arbi'o gi'e masno limna xruti abu i le flira cu mutce le ka blabi to ja'e le nu cinmo sei la alis pensi toi i sy lauble je desku voksa cusku lu e'u mi'o klama le korbi ibabo mi do jungau le mi lisri i do ba jimpe le du'u makau krinu le nu mi xebni lo'e mlatu e lo'e gerku li'u

i ca mapti tcika le nu cliva kei ki'u le nu le lalxu ca'o tisna loi cipni ku joi loi danlu vu'o poi ba'o farlu ly i lo datka lo cipnrdodo lo cipnrlori lo cipnrxakuila so'o drata noi vrici je cizra danlu i la alis lidne i piro le girzu cu limna seka'a le korbi

4 cimo'o [A Caucus-Race and a Long Tale]

cimo'o

i le me la kaukus nu bajra jivna e le clani linsi

i je'u cizra simlu gunma co jmaji le se rirxe i lei cipni zo'u le pimlu cu dandu i lei danlu zo'u le kerfa cu jibni snipa i le romei zo'u cilmo carmi gi'e fengu gi'e na'e kufra

i le pamoi co preti cu li'a du'u ta'i makau za'ure'u sudga i casnu la'edi'u ibabo zi lo mentu be li so'u simlu le ka rarna kei fa le nu la alis cu facki le du'u abu pendo tavla le romei tai le nu da'i abu se slabu ra ze'a le nu abu jmive i je'u abu pu ze'u daupro la cipnrlori noi uo badri carna gi'e cusku lu mi do tolcitmau gi'eja'ebo

junmau li'u po'o i la'e di'u zo'u la alis na curmi secou le nu djuno le du'u ly nanca makau i ki'u le nu la cipnrlori cu je'a tolsarxe le nu cusku le du'u ly makau nanca cu na se sumji se cusku

i uo la smacu noi simlu co catni ra cu krixa lu ko zutse doi rodo gi'e tinju'i mi i ba'e mi bazi sudgau do li'u i le romei cazi zutse gi'e barda djine co se midju la smacu i la alis ca'o xanka catlu sy ki'u le nu abu birti le du'u co'a bilma bai le nu na sudga baziku

i lu ta'a sei la smacu cu vajni simlu cusku i xu ro do bredi i la'edi'e cu sudrai piro loi se djuno be mi i ro ko smaji e'o i lu la uiliam poi jamji'a zi'e noi le jdaralpre cu zanru le jamna te zunkte be fi ke'a cu ze'i trubi'o loi glepre noi ke'a turni djica gi'e pu mutce co se tcaci le nu trubasti je jamji'a i la eduin joi la morkar vu'ono'u lei turni be la mersias fa'u la nortumbrias li'u li'u

i lu o'unai sei la cipnrlori cusku je desku li'u

i lu ke'ope'u sei la smacu cu cusku je frumu jekeku'i clite mutce i xu do cusku li'u

i lu mi na go'i sei la cipnrlori sutra co cusku li'u

i lu mi pu jinvi le du'u ja'a go'i sei la cmaci cu cusku i mi di'a cusku i lu la eduin joi la morkar vu'ono'u lei turni be la mersias fa'u la nortumbrias cu xusra seva'u ubu ije la stigand ji'asai no'u le najgi ke ralju jdagidva pe la kanterburis cu facki fi da fe le du'u se djica li'u li'u

i lu facki fi ba'e ma sei la datka cu cusku li'u

i lu lu facki fi ba'e da li'u sei la smacu cu spudu co fengu milxe i li'a do djuno le du'u zo da sinxa makau li'u

i lu mi ja'a djuno le du'u zo da sinxa makau kei ca le nu mi facki sei la datka cu cusku fi da noi so'eroi banfi ja curnu i le preti zo'u fi ma facki fa le ralju jdagidva li'u

i la smacu na sanji le di'u preti ije sutra co xruti cusku lu lu facki fi da fe le du'u se djica fa le nu kansa la edgar atelin le nu penmi la uiliam gi'e friti fi ubu fe le nu turni i le nuntra be la uiliam ca le nu cfari cu fadni i ku'i le nuntolclite be lai norman ne ubu li'u i pei doi do iu sei sy ca'o cusku jecabo carcra be la alis li'u

i lu cilmo du'i le ka pu cilmo sei la alis badri cusku i simlu le ka nasai sudgau mi li'u

i lu iseki'ubo sei la dodos junri cusku co sa'irbi'o be fi lei tuple mi stidi le du'u le nu penmi cu tolca tezu'e le nu bazi co'a pilno lo tolcadmau danfu li'u

i lu ko tavla bau la lojban sei la cipnrxakuila cifnu cu cusku i mi na se slabu le smuni be pisu'omu lei di'u clani valsi ije pe'i do ji'a na go'i li'u i la cipnrxakuila cifnu cu krogau le stedu mu'i le nu mipri le nu cisma i pisu'o lei drata cipni cu mi'amli co se tirna

i lu le pupu'o se cusku be mi sei la dodos se xrani cusku cu se du'u le traji le ka se jalge le nu sudgau mi'o cu me la kaukus nu bajra jivni li'u

i lu ki'a me la kaukus nu bajra jivni sei la alis cusku li'u i abu na'e mutce co djica le nu djuno i ku'i la dodos pu denpa tai le nu dy jinvi le du'u ba'e da ei tavla ije no drata pu simlu le ka djica le nu cusku de

i lu je'u sei la dodos cusku le xagrai co ciksi tadji cu nu zukte li'u to'i ji'a ki'uda'i le nu do ji'a djica co troci ca lo dunra donri kei mi cusku le sedu'u la dodos zukte makau toi

i pamai dy finti lei sinxa be le nunbajra pluta be'o noi cukla milxe to le satci tarmi na vajni sei dy cusku toi ibabo punji le romei le pluta vifa'uvaku i cusku no lu i pa i re i ci i ko bajra li'u i ku'i co'a bajra ca le nu djica ije co'u bajra ca la nu djica iseki'ubo na frili fa le nu djuno le du'u mo'u makau bajra jivni i ku'i ca le nu ba'o bajra ze'a lo cacra be li pimuji'i gi'e za'ure'u je'a sudga kei la dodos spaji kixsku lu le nu jivni cu mulno li'u i le romei cu denmi sanli gi'e vasxu mutce gi'e te preti fi lu ku'i ma jinga li'u

i le di'u preti zo'u la dodos na kakne co danfu secrau le nu pensi mutce ije dy ze'u zutse fau le nu pa degji cu danre le firgapru kei to le se tarmi be la ceikspir bei va'o lei pixra be ri toi ca le nu lei drata cu denpa je smaji i uo la dodos cusku lu ba'e ro da cu jinga ije ei ro da se cnemu li'u

i lu ku'i ma dunda le se jinga sei le voksa so'ime i cu te preti li'u

i lu li'a ba'e ta li'u se cusku la dodos noi sinxa la alis sepi'o pa degji ije le romei bazi denmi je sanli je sruri abu gi'e se cfipu kixsku lu se jinga i se jinga li'u

i la alis cu na milxe ji'asai co djuno le du'u ei zukte makau ije ki'u le nu dunku kei abu punji le xance le daski ije vimcu le bi'u tanxe be lei titydja to u'a le silna djacu na nermu'u le tanxe toi gi'e fairgau lei titydja neseba'i lei se jinga i satci fa le nu ro zvati cu te dunda pa titydja

i lu ku'i ei dunda lo se jinga ba'e ta li'a sei la smacu cu cusku li'u

i lu li'a sei la dodos cu spuda co junri i do ponse ma poi drata zi'epe vi le daski pe do sei dy jmina cusku je carcra be la alis li'u

i lu lo tajgai po'o sei la alis badri cusku li'u

i lu ko dunda ta mi sei la dodos cusku li'u

ibabo le romei cu za'ure'u denmi je sruri abu ca le nu la dodos junri dunda le tajgai gi'e cusku lu mi'a pikci do le nu do cpasarxe le vi melbi tajgai li'u ije ca le nu dy mo'u cusku le tordu se cusku kei le romei cu geirkrixa

i la alis cu jinvi le du'u piro le tcini cu mutce co cizra i ku'i le romei cu simlu le ka junri kei ja'e le nu abu na darsi le nu cmila i ji'a ki'u le nu abu na sanji le du'u ei cusku makau kei abu krobi'o rinsa gi'e lebna le tajgai serai le ka junri simlu kei verai lei selka'e

i le bavla'i cu nu citka lei titydja i le go'i cu rinka lo nu savru gi'e cfipu kei ki'u le nu lei barda cipni cu pante le nu na kakne le nu vu'irga'e le mebycy.moi kei kei e le nu lei cmalu cu nandu vasxu gi'e ei se darxi fo le trixe i ku'i fanmo uo ije le romei cu za'ure'u zutse co djine gi'e pikci la smacu le nu di'a cusku

i lu do nupre le nu cusku le citri be do ju'odai be'o sei la alis cusku e le du'u ki'u makau do xebni -y- my e gy li'u seke jmina cusku abu noi smaji gi'e terpa ru'e le nu da'i sy se xrani za'ure'uku

i lu le lisri pe mi cu clani je se badri sei la smacu cu cusku je carcra be la alis je dricmo li'u

i lu clani je'u linsi sei la alis cusku co manci catlu be le rebla be la smacu i ku'i ki'u ma do ly mi'a skicu le ka se badri li'u ije abu ca'o manci la'e di'u ca le nu la smacu cu cusku ja'e le nu le abu sidbo be le rebla linsi cu simsa di'e

la fengu cu cusku
 fi lo smacu poi
 fy penmi fi le zdani
 fe lu e'u
 mi'o klama le flalu
 i ai mi flapro do i e'u
 mi na tolsarxe zanru

la fengu lo smacu
 noi fy ke'a
 cpacu cu
 penmi le
 zdani i
 fy di'e
 jungasnu
 i i'a no
 proki'u i ei
 flajvisi'u
 i ca le ca
 cerni no
 drata cu
 fasnu
 i e'o mi
 farlu
 sei le smacu
 cu darlu i
 secau lo
 pairkamni
 li'a mi'o
 nolpratra
 i o'u na
 vajni i
 je ba'e mi
 pajni
 sei la
 fengu cu
 cusku
 le nu
 do
 se
 catra

i lu do na jundi sei la smacu cu junri cusku be fi la alis i do pensi ma li'u

i lu ienai ga'inai sei la alis toljgira cusku i do co'a cusku le mumoi be lei kruvi pe'i li'u

i lu ije ge na go'i gi na cumki sei la smacu cu krixax co cladu jeke fengu mutce li'u

i lu ui jgena li'u se cusku la alis noi roroi breidi le nu sidju zi'e noi ru'u xanka catlu i lu ui e'ocai mi do sidju le nu luzgau jy li'u

i lu ai mi curmi no simsa sei la smacu cusku je sa'irbi'o je cliva i do mi tolsi'a fau le nu do cusku lo tai nonselsmu li'u

i lu ainai go'i sei la alis uu pikca i ku'i fu'i je'u do selxaicni li'u

i le smacu cu spuda fi le nu cmoni po'o

i lu e'osai ko xruti klama gi'e mo'u cusku le lisri be fi do li'u se kixsku la alis sy ijoi lei drata cu kansa co cusku lu go'i e'ocai li'u i ku'i la smacu cu desygau po'o le stedu gi'enai depsarxe gi'e sutyze'a le ka cadzu

i lu uu na stali li'u se xersku la cipnrlori cazi le nu mutce co na'e se viska ije le tolci'o cakyjukni cu cabmoi cusku fi le tixnu be ri fe lu ie doi dirba iu be mi i a'o ctuca do le nu do noroi fengu li'u i lu ko na cusku doi mamta sei le citno cakyjukni cu cusku i do jai banzu le nu feygau lo'e xamsi cakcurnu li'u

i lu a'o la dinas zvati ju'ocai sei la alis bacru cusku be fi no steci i dy cazi cpacu da'i li'u

i lu la dinas ki'a va'o le nu mi zifre le nu te preti sei la cipnrlori cusku li'u

i la alis cu djicni spuda ki'u le nu abuboi roroi breidi le nu tavla fi le abu danlu kei kei fi lu la dinas cu memi'amo mlatu iji'a certu je'u le nu kavbu loi smacu i ui au do viska dy ca le nu jersi loi cipni i je'u dy lo'e cmalu cipni du'igi catlu gi citka li'u

i le di'u se cusku cu se jalge lo banli nu cinmo savru ra'i lei zvati i lo cipni cu sutra le nu cliva ibo pa tolci'o cipnripika co'a cliva brebi'o gi'ecabo cusku lu eije'u mi zdakla i le nictu vacri na mapti le galxe be mi li'u ije lo cipnrkanario cu nalsto voksa kixsku fi lei panzi fe lu ko klama doi dirba i je'u ca teika le nu ro do cu sipna bu'u le ckana li'u i ki'u loi vrici le romei cu cliva ije la alis cu bazi kansa no da

i lu au mi na pu tavla fi la dinas sei abu sezysku co badri i no da pe viku cu nelci dy pe'i i ku'i ju'o dy xagrai piro loi mlatu pe le munje i oi doi dinas iu i'i xu mi ba za'ure'u viska do li'u i caku la alis uu co'a za'ure'u klaku ki'u le nu abu cinmo le ka mutce co nonkansa je badri ibazibo ku'i abu cu za'ure'u tirna le nu vu stapa ije abu djicni galvi'a gi'e milxe co pacna le du'u la smacu cu te sidbo fi lo drata gi'e xruti tezu'e le nu mo'u cusku le lisri

5 vomo'o le ractu cu benji lo cmalu me la bil

le ractu cu benji lo cmalu me la bil

i me le blabi ractu noi masno bajra xruti gi'e xanka ke sruri catlu ca le nu klama kei tai le nu ry da pu cirko i abu tirna le nu ry lauble sezysku lu oi le noltroni'u i oi le noltroni'u doi dirba xance be mi doi skapi be mi doi zbikre be mi zo'u ny da mi ba catrymi'e ju'osai ijo ro mabrnfuru cu mabrnfuru i mi ko'a ma falceru li'u i la alis zi smadi le du'u ry sisku le bifpra e le blabi ke kanba gluta remei i abu noi xendo cu co'a kalte ko'a i ku'i ko'a na se viska i roda simlu le ka ba'o cenba kei ba le nu abu limna le lalxu i le barda kumfa poi vasru le blaci jubme e le cmalu vorme ba'o mulno canci

i baziku le ractu cu sanji la alis noi ru'u kalte ku'o gi'e fengu kixsku fi abu fe lu ue doi meri,An do ma zunkte bu'u le bartu i ko ca bajra klama le zdani gi'e bevri lo gluta remei e lo bifpra mi i ko sutra li'u i la alis cu tai terpa ja'e le nu abu zi bajra fa'a le farna poi ry jarco ku'o gi'e na troci le nu ciksi le se srera be ry

i lu tu ba se spaji le nu facki le du'u mi makau du i ku'i e'e mi bevri le bifpra e lei gluta tu y va'o le nu da'i mi tolcri li'u i ca le nu cusku di'u kei abu penmi lo cnici ke cmalu zdani noi le ke'a vrogai cu se dandu lo carmi lastu tapla noi le cmene po'u lu blabi ractu li'u se ciska fi ke'a i abu nerkla secau le nu vrodarxi kei gi'e sutra le nu serti cpare kei gi'e terpa le nu penmi la meri,An sa'e noi da'i barklagau abu le zdani pu le nu tolcri le bifpra e lei gluta

i lu ua cizra sei la alis sezysku fa le nu mi selfu lo ractu i ru'a za'umai la dinas mi ba minde li'u i abu co'a se xanri loi klesi be lei cuntu be'o poi da'i fasnu i lu doi nix alis ko ca klama ti gi'e breidi le nu cadzu li'u i lu mi bazi klama doi kurji i ku'i ei mi jundi le vi kevnai gi'e fanta le nu le smacu cu barkla li'u i lu ku'i ianai curmi sei la alis di'a co'e le nu la dinas cu stali le zdani va'o le nu dy co'a tai minde lei prenu li'u

i caku abu zvati lo cnici ke cmalu kumfa noi lo jubme cu lamji le canko be ke'a gi'e se cpana to du'i le abu se pacna toi lo bifpra e reji'ici cmatce ke blabi ke kanba gluta remei i abu lebna le bifpra e pa le gluta remei gi'e pu'o cliva le kumfa ca le nu abu catlu fa'a lo cmalu botpi noi sanli le jibni be le minra i ca le ca krefu noda by tcita fi'o valsi lu ko mi pinxe li'u i ku'i abu gacri vimcu gi'e punji by le abu ctebi i lu ju'o ca ro nu mi pinxe ja citka da kei sei abu sezysku ba'e de poi cinri cu fasnu iseki'ubo mi ba zgana le nu le vi botpi makau gasnu i a'o ti gasnu le nu mi za'ure'u banro lo barda i mi mutce le ka tatpi le nu tai cmatce li'u

i ja'a ca'a gasnu la'e di'u i go'i pu le se pacna be abu i pu le nu abu mo'u pinxe le xadba be le se botpi kei le abu stedu ca'o catke le drudi i abu bilga le nu korcu kei le nu marbi le abu cnebo le nu porpi i abu sutra le nu punji le botpi kei gi'e sezysku lu banzu i a'o mi co'u banro i caku mi ka'enai pagre le vorme i au mi na pu pinxe lo tai mutce li'u

i oi dukse le ka lerci kei fa le nu djica la'e di'u i abu banro gi'e za'o banro gi'e bazi bilga le nu sanli le loldi lei cidni ibazibo le canlu na banzu la'e di'u ji'asai i abu troci le nu vreta gi'e punji nu'ige lo cidni le lamji be le vorme gi le drata birka le sruri be le stedu i ku'i abu za'o banro i uo abu tolse'a lo birka pa'o le canko gi'e setca lo jamfu le danmo tubnu gi'e sezysku lu uo mi ka'enai gasnu lo bancu i mi ma ba lifri li'u

i zanfu'a la alis fa le nu le cmalu ke makfa botpi ca mulno le ka ce'u makau rinka i abu ca na banro lo bramau gi'e ku'i mutce le ka tolkufra i za'a na cumki fa le nu abu za'ure'u bartu le kumfa iseki'ubo abu tolgei uenai

i lu le mi zdani ti mutce zmadu le ka pluka sei la alis uu pensi i bu'u zy genai roroi zenba joi jdika ginai roroi se minde loi smacu e loi ractu i aunairu'e mi na klama fo le ractu kevna i ku'i i ku'i cizra fa le tai nu jmive i mi ja'a kucli le du'u mi makau ca'a lifri i ca le nu mi tcidu loi crida lisri kei mi krici le nu lo'e tai cuntu noroi fasnu i caku mi cy midju i ei finti lo cukta mi i ie ei go'i i ai ca le nu mi ba'o banro kei mi cy finti i ku'i mi ca ba'o banro sei abu badri jmima i ba'unai le bu'u canlu na banzu le nu banro lo bancu li'u

i lu ku'i ja'o sei la alis pensi mi ba noroi zenba le ka tolcitno i la'e di'u pluka i mi noroi tolcitno ninmu i ku'i mi roroi cilre da ei i oi aunai go'i li'u

i lu oi doi alis noi bebna sei abu sezyspuda ta'i ma do da bu'u ka'e cilre i ue le canlu ja'aru'e banzu tu'a do i noda bu'u canlu lei ve cilre cukta li'u

i abu ca'o co'e i pamai darlu lo mlana gi'e remai darlu le drata gi'e zbasu lo vajni nuncasnu le romei i ku'i ba lo mentu be li so'o abu tirna lo voksa noi bartu ku'o gi'e sisti tezu'e le nu tinzga

i lu doi meri, An doi meri, An sei le voksa cu cusku ko bevri lei mi gluta mi caku li'u ibabo tirna lo nu cmalu ke jamfu stapa lei serti i la alis djuno le du'u le ractu cu klama tezu'e le nu sisku abu i abu desku ja'e le nu deskygau le zdani i abu tolmorji le nu ge abu ca kילו le ractu le ka barda giseki'ubo noda krinu le nu terpa ry

i caku le ractu cu tolcliva le vorme gi'e troci le nu kargau vy i ku'i ki'u le nu ge le vrogai cu ei fa'ane'i karbi'o gi le cidni be la alis cu catke vy kei le se troci cu se fliba i la alis tirna le nu ry sezysku lu ai mi srukla gi'e nerkla fo le canko li'u

i lu na ba go'i sei la alis pensi li'u i abu denpa le nu abu krici le du'u tirna le nu le ractu cu cnita le canko ibazi abu jai suksa fai le nu pejgau le xance gi'e jgari le vacri i abu kavbu noda gi'eku'i tirna lo cmalu se krixia e lo nu farlu e lo porpi blaci sance gi'e nibji'i la'e di'u le du'u cumki fa le nu ry farlu lo guzme tanxe a lo simsa

ibabo lo fengu voksa to be le ractu toi co'e lu ju'i pat ju'i pat do ma zvati li'u ibabo lo voksa noi abu ke'a na pu tirna ku'o lu ju'o mi ti zvati i mi kakpa sisku lo'e plise doi banli li'u

i lu o'onai kakpa sisku lo'e plise sei le ractu cu fengu cusku i ko mi klama gi'e sidju le nu mi ba'e ti bartu li'u to sance loi bancu ke porpi blaci toi

i lu pau re'i pat ta poi zvati le canko cu mo li'u

i lu ju'o ta birka doi banli li'u to py bacru zoi zoi birrrka zoi toi

i lu birka doi bebna i ma pu viska lo birka poi tai barda i ta se tisna piro le canko li'u

i lu ju'o go'i doi banli i ku'i ta ca'a birka li'u

i lu iseju noda va cuntu ta i ko ta vimcu li'u

ibabo ze'u smaji i la alis so'uroi tirna loi lauble selsku no'u mu'a lu ju'o mi na nelci doi banli i nasai go'i li'u e lu ko zunkte tai le mi te minde doi tolvri li'u i uo abu rere'u pejgau le xance gi'e rere'u jgari le vacri i caku tirna re cmalu se krixia e lo porpi blaci sance bancu i lu ue xokau guzme tanxe cu zvati sei la alis pensi i a'u ma bazi se zunkte i le nu lacpu mi pa'o le canko zo'u au kakne i ju'o mi na djica le nu za'o stali ti li'u

i abu ze'a denpa gi'e tirna noboi za'umoi i romai tirna lo sance be lo cmalu carce xislu e so'isai voksa noi tavla kansiu i abu snada le nu jimpe tu'a lei valsi i lu le drata serti ma zvati i ua ei mi bevri le pamei i la bil cu co'e le drata i ju'i bil ko ta ti bevri doi citno i ko ta punji le vi kojna i na go'i i puku ko ta jonsimgau i ta za'o na preja lo galtu banzu i ju'o

ta ba xamgu banzu i ko na tcila jundi i ju'i bil ko jgari le vi skori i xu le drudi ba sarji i ko jundi le va kluza tapla i oi ta ca'o farlu ju'i cnita to cladu popsna toi i ma ta gasnu i ru'a la bil i ma ba cnita klama fo le danmo tubnu i mi na.e ko go'i i ai mi na go'i i la bil ba go'i i ju'i bil le selse'u do minde le nu do cnita klama fo le danmo tubnu li'u

i lu a'a eipei la bil cnita klama fo le danmo tubnu sei la alis sezysku i su'a la bil bilga le nu zunkte roda i mi na basti la bil gi'u te pleji lo mutce i le vi fagzda ja'a jarki i ku'i pe'i mi ka'e tikpa milxe li'u

i abu tolse'a le jamfu le tubnu sela'u le kakne traji gi'e denpa le nu tirna lo cmalu danlu to abu na smadi le du'u danlu makau toi noi sraku je srukla ne'i le tubnu ga'une'a abu ibazi ca le nu sezysku lu ti me la bil li'u kei abu paroi kinli tikpa gi'e denpa le nu zgana le nu makau ba fasnu

i pamai abu tirna lo voksa so'ime'i pe lu ta mo'i me la bil li'u i remai go'i le ractu voksa pe lu ko ta jgari doi le lamji be le spati jimte i cimai go'i lo smaji i vomai go'i lo drata ke voksa kalsa pe lu ko sarju le stedu be ta i gau ko ta pinxe lo jikru i ko ta na vaxydicra i ma mo doi pendo i do ma pu lifri i ko mi'a jungau la'e di'u li'u

i romai go'i lo cmalu je ruble je lauble voksa to lu ta me la bil sei la alis pensi li'u toi pe lu mi ja'aru'e djuno i banzu ki'e i mi ca kufra iku'i mi dukse le ka jenca kei le nu jungau i mi djuno le po'o du'u da mi catke tai lo danre selkei plipe i mi tolfau tai tu'a lo'e tsani jakne li'u

i lu ie do ca'a go'i doi pendo sei lei drata cu cusku li'u

i lu ei mi'o jelgau le zdani sei le ractu voksa cu cusku li'u i la alis krixax serai le ka cladu kei lu ganai go'i gi mi ba je'icru la dinas do li'u

i zi smaji mulno i la alis pensi lu a'u ta ma ba zunkte i ei va'o le nu prijex cu vimcu le drudi li'u i bazi lo mentu be li paji'ire co'a za'ure'u ru'u muvdu i la alis tirna le nu le ractu cu cusku lu pa carcylai cu banzu le nu co'a co'e li'u

i lu pa carcylai no'u ba'e ma sei la alis pensi li'u i ku'i abu ze'u na senpi ibazi so'i cmalu bidju cu carvi pa'o le canko i su'o by darxi abu fo le flira i lu mi ti ba tolcagau sei abu sezysku li'u i abu krixax lu le'o ko na za'ure'u co'e li'u i la'edi'u cupra lo drata ke smaji mulno

i la alis se spaji sanji le nu ro le bidju cu binxo lo cmalu nanba ca le nu vreta le loldi i lo carmi co'a sidbo fi le abu menli i lu le nu mi citka pa le nanba kei sei abu pensi ba ju'o rinka le nu mi cenba le ka barda i ka'enaissai brazengau mi i ja'o ju'o pe'i cmazengau mi li'u

i seki'ubo abu tunlo pa le nanba gi'e gleki le nu facki le du'u abu ca co'a cmaze'a i ca le nu abu cmalu banzu le nu pagre le vorme keikei abu bajra klama le bartu be le zdani gi'e penmi lo so'ime'i be loi cmalu danlu joi cipni be'o noi denpa i le cmalu rebyrespa uu no'u la bil midju le romei gi'e se sarju re smacrkobaiu noi dunda lo se botpi i roda sutra fa'a la alis ca le nu abu tolcanci i ku'i abu to'o bajra serai le ka sutra kei gi'ebazi snura zvati lo denmi ricmei

i lu ei pamai sei la alis ca le nu ru'u zvati le ricmei cu sezysku mi za'ure'u banro le mi barda i ei remai mi tolcri le melbi purdi i pe'i la'edi'u cu xagrai selpla li'u

i ju'o xamgu selpla i cnici je sampu i papo'o nabmi zo'u abu te sidbo le nu co'a co'e kei naku le marai ji'asai i ca le nu abu xanka catlu ru'u lei tricru kei lo cmalu ke kinli se bacru noi vi gapru le abu stedu cu gasnu le nu abu fa'aga'u sutra catlu

i lo bratce gerpanzi fa'ani'a catlu abu sepi'o loi barda je cukla kanla gi'e ruble tengau lo xance gi'e troci le nu pencu abu i lu uu doi dirba li'u se cusku la alis sepi'o lo xlura tonga i abu mutce le ka troci le nu siclu i ku'i mutce terpa le si'o gy xagji noi la'a nibli le nu gy citka abu mu'inai le nu abu xlura

i abu ja'aru'e sanji le nu abu lo cmalu grana cu lafti gi'e jarco le gerpanzi ija'ebo le gerpanzi cu plipe le vacri ro le jamfu gi'e se pluka cmoni gi'e sezre'o le garna gi'e gasnu le nu simlu le ka gunta ri ibabo la alis rivbi le nu janli kei le nu muvdu le trixe be lo barda cpinyspa i ca le nu abu tolcanci le drata mlana kei le gerpanzi za'ure'u sezre'o le grana gi'e gunro farlu seja'e le nu sutra troci le nu jgari gy ibabo la alis noi jinvi le du'u simsa lo'e nu kelci lo braxirma zi'e noi terpa lo'e nu se stapa fi le gy jamfu cu za'ure'u bajra fa'ati'a le cpinyspa i le gerpanzi co'a so'oroi ze'i gunta le grana gi'e ve'ifa'a je ve'uto'o bajra gi'e roroi rufsu bacru gi'e romai vu zutse gi'e ta'irva'u gi'e se tance le dandu be le moklu gi'e se kanla lei xadba ganlo

i le cabna cu simlu fi la alis fe le ka xamgu mapti le nu cliva iseki'ubo abu zi co'a co'e gi'e bajra co'u le nu mutce tatpi gi'e vasxu claxu e le nu le se bacru be le gerpanzi vu se sance lo ruble mutce

i lu ku'i dirba ke cmalu gerpanzi sei la alis noi surla le nu vreta lo matnyxrula kei gi'e pilno lo my pezli le nu cupra lo brife fa'a abu cusku i mi mutce nelci le nu ctuca tu loi seltra va'oda'i le nu mi mapti fi le ka barda i oi mi jibni tolmorji le nu ei mi za'ure'u banro i a'a ei mi ma zukte i ru'a ei mi citka ja pinxe da i ku'i le banli preti zo'u go'i ma li'u

i ju'o le banli preti cu me zo ma i la alis fa'aru'u catlu lei xrula e lei srasu gi'e ku'i viska noda poi simlu le ka mapti lo'e se citka ja pinxe i lo barda mledi cu zvati lo jibni be abu gi'e simsa abu le ka galto i ca le nu abu ba'o catlu le cnita e le re mlana e le trixe be my kei abu te sidbo fi le du'u e'e catlu gi'e viska le nu makau cpana my

i abu tcena ji'u lei jamfu jipno gi'e catlu le bancu be le korbi be le mledi i lei abu kanla cu penmi lei kanla be lo barda ciftoldi noi zutse le cpana zi'e noi lei ke'a brika cu se polje zi'e noi smaji damva'u sepi'o lo clani nargile zi'e noi jundi genai abu gi no drata

6 mumo'o se djusku le ciftoldi

le ciftoldi ku joi la alis ze'a simxu le nu sma'ji catlu i bazubo le ciftoldi bevri le nargile fo le moklu gi'e o'udai a'inaidai cusku fi abu

i lu do du ba'e ma sei le ciftoldi cu cusku li'u

i di'u na xamgu mukti le nu co'a casnu i la alis toldarsi spusku lu mi y i mi na'e mulno djuno doido'u ga'inai tu'a le cabna isa'unai mi djuno le du'u mi du makau ca le nu mi ckana cliva ca le cabycerni iku'i pe'i mi so'oroi se galfi ba la'e di'u

i lu ma di'u do smuni sei le ciftoldi cu tolxendo cusku i ko ko ciksi li'u

i lu u'u mi na kakne le nu mi mi ciksi doido'u ga'inai sei la alis cusku iki'ubo uadai mi na du mi li'u

i lu uanai sei le ciftoldi cu cusku li'u

i lu u'u mi na kakne le nu xagmau cusku de'u sei la alis clite mutce spuda ki'u le nu zu'u mi na jimpe la'e de'u ije le nu clani du'eda ze'a lo donri cu cfipu mutce li'u

i lu na go'i sei le ciftoldi cu cusku li'u

i lu o'ocu'i i'a do za'o na facki sei la alis cusku iku'i ca le nu do binxo lo todbi'olanka to ju'odai do baca'a binxo ca da toi gi'ebabo binxo lo toldi kei pe'i do ba milxe le ka se cizra pe'ipei li'u

i lu pe'inaisai sei le ciftoldi cu cusku li'u

lu o'ocu'i ju'ocu'i do cinmo lo drata sei la alis cusku i mi djuno ledu'u ba'e mi da'i cinmo lo'e se cizra li'u

i lu ba'e do ga'i sei le ciftoldi cu tolsi'a cusku i do du ba'e ma li'u

i di'u xrugau le remei le krasi be le nu ta'arsi'u i la alis milxe fanza le nu le ciftoldi cu cusku lo'e tordi mutce pinka gi'e sanli zenba gi'e junri mutce cusku lu pe'i ei do cusku puku le sedu'u ba'e do du ma li'u

i lu ki'u ma sei le ciftoldi cu cusku li'u

i la'e di'u ji'a cfipu preti i la alis na kakne le nu pensi lo xamgu krinu ijebo le ciftoldi cu simlu le ka na'e se zdile iseki'ubo abu co'a cliva

i lu ko xruti sei le ciftoldi fa'a abu krixia i ei mi cusku le vajni li'u

i la'e di'u cinri simsa ju'o i la alis torni gi'e xruti

i lu ko surla stali sei le ciftoldi cu cusku li'u

i lu xu la'e di'u cu mulno sei la alis cusku li'u i abu ralte le nu fengu tai le xagrai nu abu kakne

i lu na go'i sei le ciftoldi cu cusku li'u

i la alis jdice le du'u denpa kei ki'u le nu ge noda se zukte gi cumki fa le nu cy jungau abu lo se vamji be le nu tirna i ze'a lo mentu be li so'o cy ca'o damva'u gi'e na tavla i romai cy tolpolje lei birka gi'e za'ure'u lebna le nargile le moklu gi'e cusku lu ja'o do jinvi le du'u do ba'o cenba i xu go'i li'u

i lu oi mi ba'o cenba doido'u sei la alis cusku i da zo'u mi na kakne le nu morji da tai le nu mi pu na'o no'a i ji'a mi na stodi le ka mitre kei ze'a lo mentu be li pano li'u

i lu na kakne le nu morji ba'e ma sei le ciftoldi cu cusku li'u

i lu mi pu troci le nu sitna lu ua le emalu gunkybifce li'u i ku'i ri se bacru ja'e lo frica
sei la alis badri mutce voksa spuda li'u

i lu ko sitna lu do tolcitno doi paf uiliam li'u sei le ciftoldi cu cusku li'u

i la alis polje lei xance gi'e co'a co'e di'e

do tolci'o doi paf sei le citnau cu cusku
i le kerfa be do ca'a blabi
i ue do le loldi le stedu cu sanli
i do jinvi xu le du'u drani

i ca le mi nunci'o sei la uiliam spuda
mi terpa le nu mi se benxai
i caku ju'osai mi noda se besna
i uisai mi ka'e roroi co'e

i sei le citnau cu cusku do ke'u tolci'o
gi'e ba'o binxo lo plana
i ku'i do plipe puzi vi le vorme
i ma krinu le nu ka'e go'i

i ca le mi nunci'o sei le ruskre prijje
cu cusku mi rotsu se xadni
sepi'o le vi kruji noi fepni li pa
i xu do te vecnu lo remei

i do tolci'o sei cusku i se xedja co ruble
fi ro da poi jarmau lo grasu
i ku'i le gunse do mu'o se citka
i a'u ta'i ma do snada

i ca le mi nunci'o mi flara'a gunka
gi'e roda le speni cu darlu
i le jalge ke sluji kamtsa pe le xedja
cu renvi fi le mi nunjmive

i do tolci'o sei cusku i nandu co sruma
le nu le do kanla cu vlipa
i ku'i lo xasycurnu gau do nazbi lanxe
i ma rinka le nu do tai certu

i mi ba'o spuda ci preti noi banzu
sei le patfu cu cusku i ko cumla
i pe'ipei mi do ba tirna ze'esai
i ko cliva inaja mi do tikpa

i lu di'u na drani se cusku sei le ciftoldi cu cusku li'u

i lu u'u na mulno drani sei la alis toldarsi cusku i su'o le valsi ba'o se galfi li'u
 i lu toldrani co'a le cfafanmo co'u le tolcfafanmo sei le ciftoldi cu birti cusku li'u i smaji
 ze'a lo mentu be li so'o
 i le ciftoldi cu tavla pamoi
 i lu aupei do clani mitre ma sei cy te preti li'u
 i lu ue i le du'u mitre makau na vajni sei la alis sutra spuda i na nelci le nu tai cafne fa
 le nu cenba i do djuno li'u
 i lu mi ba'e na djuno sei le ciftoldi cu cusku li'u
 i la alis cusku noda i abu pu tai se fapro noroi le abu nunjmive gi'e ca cinmo le nu fengu
 binxo
 i lu xu do ca se mansa sei le ciftoldi cu cusku li'u
 i lu y au mi braze'a doi do'u sei la alis cusku i le nu cenmitre li ze cu mutce le ka mabla
 li'u
 i lu iasai mutce le ka zabna sei le ciftoldi cu fengu cusku li'u i cy sanli binxo ca le nu
 tavla to cy satci cenmitre li ze toi
 i lu ku'i mi na se tcaci sei la alis kecti tonga pante li'u i abu pensi lu au lei vi danlu na
 tai jai frili fai le nu se cnixrani li'u
 i lu do ba se tcaci sei le ciftoldi cu cusku i cy punji le nargile le moklu gi'e co'a za'ure'u
 damva'u
 i caku la alis denpa lenu cy di'a tavla iba lo mentu be li paji'ire le ciftoldi cu vimcu le
 nargile le moklu gi'e paji'iremoi tengau le moklu gi'e desku i cy cliva le gumri gi'e cpare le
 srasu le darno gi'ecabo piksku po'o lu pa mlana do clazengau ije le drata mlana do torzengau
 li'u
 i lu pa mlana be ba'e ma i le drata mlana be ba'e ma sei la alis pensi li'u
 i lu le gumri li'u se cusku le ciftoldi tai le nu gy tirna le abu selpensi ibazibo canci
 i la alis pensi zgana le gumri ze'a lo mentu gi'e troci co facki le re mlana gy i gy prane
 cukla iseni'ibo le nabmi cu nadycai iku'i ca le fanmo abu tengau lei birka ru'u le gumri ve'a
 le selku'e gi'e popygau sepi'o ro le re xance le korbi lo cmalu
 i lu ma fa'u ma mo fa'u mo sei abu sezysku li'u i cmabatci le pritu cmalu tezu'e lenu
 troci le selri'a ibazibo ganse lo vlile nundarxi le xejni'a i ri darxi le jamfu
 i abu carmi terpa le suksa nunstika iku'i cinmo le nu ei na fesygau le temci mu'i lenu abu
 sutra tolba'o ije zi co'a zunkte lenu citka piso'u le drata cmalu i le abu xedja cu tai tagji te
 damre le jamfu ja'e le nu carmi nandu fa lenu kargau le moklu iku'i ca le fanmo cu kargau
 gi'e snada lenu tulcti lo pagbu be le zunle cmalu
 * * * * *
 * * * * *
 * * * * *
 i lu ua le stedu be mi cu zifre li'u se cusku la alis fi'o tonga le ka gleki poi bazi binxo le
 ka tepselspaji kei ca lenu facki le du'u na ka'e tolcri le janco i abu fa'ani'a catlu gi'e viska
 lo tcebra clani cnebo po'o noi stani simsa sanli le xamsi be fi lo ni'azu crino pezli
 i lu le va crino cu ba'e mo sei la alis cusku i lei mi janco ba'o klama ma i oi doi xance
 be mi ki'u ma mi nalka'e le nu viska do li'u i abu muvgau xy ca le nu tavla i ku'i se jalge
 lo po'o cmalu nu desku fa lei darno ke crino pezli

i le nu muvgau lei xance le stedu cu simlu le ka na cumki iseki'ubo abu troci le nu muvgau le stedu lei xance i abu mutce gleki le nu facki le du'u le cnebo cu se frili le nu krobi'o fa'a roda tai tu'a lo'e since i abu ba'o snada le nu krobi'o ja'e lo melbi zigzagi kei gi'e bredi le nu sfubu le jbini be lei pezli noi abu facki le du'u ke'a na'e drata le gapru be lei tricu noi ni'a ke'a abu pu klama icabo lo kinli se bacru cu gasnu le nu abu sutra ti'ekla i lo barda tcacpi pu vofli fa'a le abu flira gi'e vlile darxi abu le nalci

i lu ii since sei le tcacpi cu krica li'u

i lu mi ba'e na since sei la alis fengu cusku i oi ko mi cliva li'u

i lu since ke'u sei le tcacpi cu mlimau rapsku li'u i ty klaku jmina lu roda poi mi troci zo'u da na mansa sy li'u

i lu mi jimpe noda le te tavla be fi do sei la alis cusku li'u

i lu mi troci tu'a lo'e tricu genja ije mi troci tu'a lo'e rirkoi ije mi troci tu'a lo'e spabi'u sei le tcacpi secau le nu jundi abu cu cusku iku'i noda lo'e since cu pluka li'u

i la alis zenba le ka cfipu ce'u iku'i abu pensi le du'u noda prali le nu jmina cusku pu lenu la tcacpi cu mu'o tavla

i lu nandu fa lenu kurji le sovda kei po'onai sei la tcacpi cu cusku ije ji'a ei mi mi kajde lo'e since ze'a le nicta e le donri i ze'e le jeftu be li ci mi sipna noda li'u

i lu mi mutce xenru le nu do se fanza sei la alis noi co'a jimpe le smuni be fi cy cu cusku li'u

i lu mi posycu'a le tricu galrai be le ricfoi sei le tcacpi cu krixan zenba ke ranji cusku icabo mi pensi le du'u uo mi zifre fi le nu sincycu'u i ue torni klama fi le tsani i oi since li'u

i lu ku'i ju'asai mi ba'e na since sei la alis cusku i mi y mi li'u

i lu a'a do ba'e mo sei le tcacpi cu cusku i mi zgana le du'u do troci co finti da li'u

i lu mi y cmalu nixli li'u la alis se cusku co senpi ki'u lenu morji le nu so'iroi selstika ze'a le ca dorni

i lu lisri lakne ianai sei le tcacpi cu tolsi'arai tonga cusku i mi ze'epu viska so'i cmalu nixli iku'i nori se cnebo lo simsa be ta i ienaicai i do since ije e'enai do tolxu'a i la'a do bazi cusku le sedu'u do ze'epu na vu'izga lo sovda li'u

i lu mi ja'a vu'izga lo sovda sei la alis noi mutce jetsku verba cu cusku iku'i ka'u lo'e cmalu nixli cu dunli lo'e since le ni citka lo'e sovda li'u

i lu ianai sei le tcacpi cu cusku iseni'ibo lo'e cmalu nixli cu since da i mi ja'o cusku di'u li'u

i le sidbo tai cnino la alis ja'e le nu abu smaji ze'a lo mentu be li pabi'ire i la'e di'u curmi le nu le tcacpi cu jmina lu ju'osai do sisku lo'e sovda i na vajni mi fa le du'u do cmalu nixli gi'ikau since li'u

i lu mutce vajni ba'e mi sei la alis sutra cusku i ku'i mi na sisku lo'e sovda ca'aku i ji'a romu'ei le du'u mi go'i kei mi na djica lei me do moi i mi na nelci lo'e nalseljukpa sovda li'u

i lu ko cliva va'oku sei le tcacpi cu tolxendo tonga cusku li'u i ty za'ure'u zutse le ty zdani i la alis dzikla le jbini be lei tricu serai le kamxamgu verai lei selka'e va'o le nu le abu cnebo ku joi lei jimca cu za'o se jgena i so'iroiku abu bilga le nu tolseto'i cy i baku abu morji le nu abu za'o jgari lei gumri spisa lei xance i abu co'a junri zukte le nu citka pa spisa pamai e le drata remai i abu su'oroj zenba gi'e su'oroj jdika iromai abu snada le nu teaci clani

i abu pu mitre lo drani jibni zu lo tai mutce ja'e le nu cizra ca le cfari i ku'i abu se tcaci binxo ze'a lo mentu be li so'u gi'e di'a ta'e sezytavla i lu uo le xadba be le mi selpla ba'o se zunkte i u'e lei bu'u nuncenba cu cizra i mi noroi birti le du'u mi ba binxo makau zi lo mentu i ku'i mi ba'o xruti le ka drani mitre icaku ei nerkla le melbi purdi i a'u ta'i ma zunkte la'e di'u li'u i ca le nu cusku di'u kei abu suksa tolcliva lo klina noi vasru lo cmalu zdani noi mitre li ji'ipa i lu romu'ei le du'u makau xabju ta kei sei la alis pensi na drani fa le nu tolcanci tai le ca nu mi mitre i va'oku mi terpygau mutce li'u i seki'ubo abu co'a za'ure'u citka le pritu spisa gi'e na darsi le nu jbikla le zdani kei pu le nu ba'o jdika ja'e le nu cenmitre li reno

7 xamo'o [Pig And Pepper]

le xarju .e lei tsaprpiperi

i ze'a lo mentu abu sanli gi'e catlu le zdani gi'e pensi le du'u ei bazi zunkte makau icabo lo selfu poi dasni le manfyta'u cu bajra cliva le ricmei to'i abu jinvi le du'u sy selfu kei fo le nu sy dasni le manfyta'u i va'o da'i na'e bo la'e di'u ca le nu viska le flira kei po'o abu te cmene sy zo finpe toi gi'e cladu darxi le vorme le degycidni i vy karbi'o gau lo drata manfyta'u dasni selfu noi se flira lo cukla gi'e se kanla lo barda tai tu'a lo'e banfi ije le re selfu sei la alis sanji zo'u le kerfa cu pumvau gi'e cukla gacri piro le stedu i abu mutce co kucli le du'u srana makau kei gi'e parkla lo milxe co bartu be le ricmei ki'u le nu tinju'i

i pamai le finpe selfu cu tolsa'e le cnita be le sy birka lo barda xatra noi jibni dunli sy le ka barda i sy dunda xy le drata gi'e junri tonga cusku lu fi le noltroni'u cu fityti'i fa le noltruni'u fe le nu kelcrkroke li'u i le banfi selfu cu mintu fi le ka junri tonga kei gi'e milxe stika le vals pors gi'e refsku lu fa le noltruni'u cu fityti'i fi le noltroni'u fe le nu kelcrkroke li'u

ibabo le remei cu krobi'o rinsa simxu i lei kerfa be le remei cu xrebi'o

i la alis tai cmila mu'i la'e di'u ja'e le nu bilga le nu bajra xruti le ricmei ki'u le nu abu terpa le nu ry tirna abu i ca le nu abu za'ure'u mipri catlu kei ge le finpe selfu ba'o cliva gi le drata cu zutse le loldi ne'a le vorme gi'e bebna catlu fa'a le tsani

i la alis toldarsi klama le vorme gi'e darxi

i lu noda do prali le nu darxi sei le selfu cu cusku i go'i ki'u reda i pamai mi do dunli le ka zvati le mokau mlana be le vorme i remai ne'i cupra lo tai savru ja'e le nu noda kakne le nu tirna do li'u i ju'o lo tolfadni savru ca'o nenri i ru'i cmoni je senci i ru'inai barda sance tai lo'e nu lo palta a lo patxu cu porpi

i lu pe'udo'u sei la alis cusku mi nerkla ta'i ma li'u

i lu le nu do darxi cu racli sei le selfu secou le nu jundi abu kei di'a co'e va'o le nu da'i mi do sepli le vorme i mu'a va'o le nu da'i do nenri kei ge do darxi gi mi curmi le nu do barkla li'u i sy catlu le tsani ze'a le nu tavla i la alis jinvi le du'u ju'osai sy tolclite la'e di'u i lu ku'i ju'ocu'i ta na kakne co rivbi la'e di'u sei abu sezysku i lei ta kanla tai jibni le gapru be le stedu iseju ei ta spuda lo'e preti i mi nerkla ta'i ma sei abu cladu ke krefu cusku li'u

i lu mi zutse ti sei le selfu cu te pinka co'u le bavlamdei li'u

i caku le vorme be le zdani cu karbi'o i lo barda palta cu sfbu le bartu fa'asai le stedu be le selfu i py ja'aru'e pencu le sy nazbi gi'e porpi janli lo tricu poi trixe sy

i lu a le bavlamji remoi djedi li'u di'a se cusku le selfu sepi'o le mintu tonga tai le nu da'i noda fasnu

i lu mi nerkla ta'i ma sei la alis sepi'o lo lauzma tonga za'ure'u retsku li'u

i lu xu do ba'e ja'a nerkla sei le selfu cu cusku i di'u pamoi loi preti li'u

i li'a la'e di'u jetnu i ku'i la alis na nelci le nu te cusku di'u i lu oi sei abu bacru sezysku ro le danlu cu darlu i banzu le nu fenkygau li'u

i le selfu cu simlu le ka jinvi le du'u mapti le nu za'ure'u te pinka i lu mi ti ba zutse sei sy cusku ru'inaiku ze'a lo djedi be li so'i li'u

i lu ku'i ei mi ma zunkte sei la alis cusku li'u

i lu lo se djica be do sei le selfu cu cusku li'u i sy co'a siclu

i lu oi noda mi prali le nu tavla ta sei la alis tolpacna cusku i ta prane bebna li'u i abu kargau le vorme gi'e nerkla

i le vorme cu pluta lo barda jupku'a noi culno lo danmo ve'a lo fanmo kubi'i le drata i le noltroni'u cu zutse lo cibyseltuple stizu bu'u le midju gi'e kurji lo cifnu i le jukpa cu korcu ga'u le fagri gi'e jicla do'e lo barda patxu noi simlu le ka culno lo stasu

i lu ju'o pidu'e tsapripiperi cu nenri le va stasu li'u se sezysku la alis noi ru'i senci

i pidu'e ty nenri ju'o le vacri i le noltroni'u ji'acai cu ru'inai senci ije le cifnu zo'u cy ru'i desfau senci joi kakcmoni i ro jupku'a zvati poi na senci cu du le jukpa a lo barda mlatu poi zutse le fagystizu gi'e relkerlo ganra cisma

i lu e'o ko mi jungau sei la alis noi milxe terpa ri'a le nu na birti le du'u xukau le nu pamoi tavla cu clite cu cusku le du'u le do mlatu tai cisma mu'i ma li'u

i lu ta tcicymlatu sei le noltroni'u cu cusku i la'edi'u krinu i do xarju li'u

i lenu ny tcevlile bacru le romoi valsi cu mukti lenu la alis sukpa plipe iku'i abu bazi jimpe ledu'u tavla le cifnu enai abu isemu'ibo virnu lenu di'a cusku

lu mi na djuno le du'u le'e tcicymlatu cu roroi gancisma i ju'o mi na djuno le du'u lo'e mlatu ba'e kakne lo'e nu gancisma li'u

i lu roboi my kakne sei le noltroni'u cu cusku ije so'eboi my ca'a co'e li'u

i lu mi na djuno fi so'u my poi ca'a co'e sei la alis tceclite cusku li'u i abu mutce se pluka le nu jorne fi le nunsimtavla

i lu do na djuno so'i da sei le noltroni'u cu cusku ije la'e di'u fatci li'u

i la alis nasai nelci le tonga pe le pinka gi'e jinvi le du'u xamgu fa le nu cfagau lo drata selcasnu i ca le nu abu troci co cuxna pa sy kei le jukpa cu lebna le patxu be lo stasu le fagri gi'e co'a zukte le nu renro ro se kuspe be jy le noltroni'u ku joi le cifnu i lei fagri tirse cu pamoi ibabo jersi fa lo tansi joi palta joi palne carvi i le noltroni'u na'e jundi caji'asai le nu darxi ny i le cifnu pu ca'o tai mutce krixaxa ja'e le nu nalcumki fa le nu djuno le du'u xukau lei nundarxi cu crogau

i lu oi e'osai ko kurji le do se tarti sei la alis terpa dunku plipe krixaxa i oi uu le ta melbi nazbi li'u ca le nu lo nalfadni barda tansi cu voffi zo'a ny gi'e naru'e beirvi'u ny

i lu va'o da'i le nu roda kurji le da cuntu kei sei le noltroni'u cu rufsu cmoni cusku le munje cu da'ibi'unai zenba le ka cacra sutra li'u

i lu la'e di'u na prali sei la alis noi mutce gleki le nu ka'e jarco piso'u le nu abu djuno cu cusku i ko pensi le nabmi poi la'e di'u ke'a rinka da'ibi'unai sera'a lo'e donri e lo'e nicta i ka'u le nu le terdi cu carna le jendu kei li revo cacra li'u

i lu lo'e catra zo'u sei le noltroni'u cu cusku ko vimcu le stedu ti li'u

i la alis xanka catlu le jukpa tezu'e le nu zgana le du'u xukau jy zukte fi le nu tinbe i ku'i le jukpe cu jicla le stasu gi'e simlu le ka na jundi iseki'ubo abu di'a co'e lu cacra li revo pe'i ji li pare pei i li'u

i lu oi ko mi na fanza sei le noltroni'u cu cusku i mi ka'enai renvi lo'e namcu li'u icabo ny co'a za'ure'u kurji le cifnu gi'e sanga lo sipygau simsa cy gi'e vlile desygau cy ca le fanmo be ro vlali'i

ko rufsu tavla le do panzi

i ko py senci sfasa

i le nu po'o py do fanza
ca'a te zukte krasi

KREFU

(to le jukpa le cifnu cu kansa toi)

ua ua ua

i ca le nu le noltroni'u cu sanga le remoi be lei vlagri kei ny ca'o vlile renro le cifnu le gapru ku joi le cnita i le se kecti cmalu cu tai krixaxa ja'e le nu la alis cu ja'aru'e tirna lei valsi

mi junri tavla le mi panzi
i mi py senci sfasa
i li'a py se pluka banzu
i tsapripiperi stasu

KREFU

ua ua ua

i lu ju'ido'u e'a do ti kurji sei le noltroni'u ca le nu renro le cifnu la alis cu cusku i ei mi mi bredygau le nu kansa le noltruni'u le nu kelcrkroke li'u i ny sutra cliva le kumfa i le jukpa cu renro lo tansi ny ca le nu ny barkla i ku'i ja'aru'e fliba le nu darxi

i la alis cu milxe nandu kavbu le cifnu ki'u lenu cizra seltai ke cmalu danlu gi'e tengau le birka e le jamfu fo roda i lu setai lo'e mumbircurnu sei la alis pensku li'u i le cmalu uu cu vruva'u setai lo'e jacfebmatra ca lenu abu kavbu iseki'ubo ze'a lo mentu be li paji'ireboi abu na kakne lo zmadu be lenu jgari

i abu zi ba le nu facki le du'u makau drani tadji le nu kurji cy keikei to no'u le nu tongau cy ja'e lo jgena gi'e tagji jgari le cy pritu kerlo ku joi le cy zunle jamfu ja'e le nu rivbi le nu cy sezytolplo toi cu bevri cy le bartu vacri i lu romu'ei le nu mi na lebna le vi cifnu kei sei la alis pensi lei du ba catra cy za lo djedi be li paji'ire i xu na zekri fa le nu cliva cy li'u i abu cladu cusku lei romoi valsi i le cmalu cu spuda cmoni to cy ca ba'o senci toi i lu ko na cmoni sei la alis cusku i nasai drani tadji le nu cusku li'u

i le cifnu cu za'ure'u cmoni i la alis xanka mutce catlu le flira be cy tezu'e le nu facki le du'u cy mokau i ju'o cy se nazbi lo gapfa'a noi lo'e xajyzbi cu zmadu lo'e re'azbi le ka ke'a simsa ce'u iji'a lei kanla be cy ca'o binxo lo mutce cmalu fi lo'e cifnu kanla i to'u la alis nasai nelci le jvinu be le dacti i lu ku'i ju'ocu'i ti kakemo po'o sei abu pensi li'u i abu za'ure'u catlu le cy kanla tezu'e le nu facki le du'u xukau lo dirgo ba'o se klaku

i na co'e i no dirgo ba'o se klaku i lu ganai do binxo lo xarju doi dirba sei la alis junri cusku gi o'i mi do co'u srana li'u i le se kecti cmalu za'ure'u kakemo to go'i gi'a xajycmo i na cumki fa le nu jdice toi i le remei di'a ze'a smaji co'e

i la alis co'a pensi sezysku lu ei mi zukte le nu mo le vi danlu kei ca le nu mi tolcliva le zdani li'u ca le nu ko'a za'ure'u cmoni tai le ka vlile kei ja'e le nu abu xalni milxe catlu le ko'a flira i caku na senpi i ko'a zmadu najenai mleca xarju i abu jinvi le du'u le nu abu ko'a ca'o bevri cu fenki mutce

iseki'ubo abu punji le danlu le loldi gi'e co'a mutce tolxanka le nu viska le nu dy smaji bajra fa'ane'i le ricmei i lu romu'ei le du'u le cifnu cu banro kei sei abu sezysku cy tolmelbi mutce verba i ku'i pe'i ta ca'a melbi xarju li'u i abu co'a pensi lo drata verba noi ke'a slabu abu gi'e da'i se xamgu le nu ke'a xarju i abu sezysku lu au djuno le du'u makau drani tadji le nu galfi vy li'u ca le nu abu milxe se spaji le nu viska le tcicymlatu noi zutse lo jimca be lo tricu za lo mitre be li su'o

i le mlatu cu cisma po'o ca le nu my viska la alis i my simlu le ka xendo sei abu pensi i ku'i my se jgalu loi clani mutce gi'e se denci lo so'isaimi iseki'ubo abu jinvi le du'u ei sinma my

i lu doi tcicymlatu li'u i abu toldarsi cfasku ki'u le nu nasai djuno le du'u xukau my nelci le cmene i ku'i my ganze'a cisma po'o i lu ua ta se pluka caku sei la alis pensi li'u i abo di'a co'e lu e'o ko mi jungau le du'u ei mi klama zo'e ti makau li'u

i lu la'e di'u jalge le du'u do djica le nu klama makau sei le mlatu cu cusku li'u

i lu tu'a makau na vajni mi sei la alis cusku li'u

i va'o la'e di'u na vajni fa le nu do klama fo makau sei le mlatu cu cusku li'u

i lu va'o lo nu mi klama ba'e da sei la alis ciksi jmina li'u

i lu ua ju'o do ca'a co'e sei le mlatu cu cusku va'o le nu do cadzu ze'a lo banzu li'u

i la alis jinvi le du'u la'e di'u ka'enai te darlu iseki'ubo abu troci tu'a lo drata preti i lu loi mo prenu cu xabju le vi sruri li'u

i lu vufa'a tu sei le mlatu cu pritu xance desku cusku cu xabju lo mapypre i vufa'a tu sei drata xance desku cu xabju lo cibmasti cicyractu i ko vitke le do se nelci i le reda cu jai fenki li'u

i lu ku'i mi na djica le nu jbini loi jai fenki sei la alis te pinka li'u

i lu o'o do ka'enai rivbi sei le mlatu cu cusku i ro ma'a vi jai fenki i mi jai fenki i do jai fenki li'u

i lu do jinvi le du'u mi jai fenki kei fo ma li'u

i lu ju'o do co'e sei le mlatu cu cusku ija do na ba'o klama ti li'u

i la alis nasai jinvi le du'u la'e di'u cu je'urja'o i ku'i di'a co'e lu do jinvi le du'u do jai fenki kei fo ma li'u

i lu pamai sei le mlatu cu cusku lo'e gerku na fenki i iepi li'u

i lu ieru'e sei la alis cusku li'u

i lu ka'u sei le mlatu cu di'a co'e lo'e gerku cu cmoni ca lo'e nu fengu kei gi'e rebra deskygau ca le nu gleki i zu'unai mi cmoni ca le nu gleki kei gi'e rebra deskygau ca le nu fengu iseni'ibo mi jai fenki li'u

i lu mi te cmene fi zo pukcmo enai zo cmoni sei la alis cusku li'u

i lu ko te cmene fi lo do se nelci sei le mlatu cu cusku i xu do kansa le noltruni'u le nu kelcrkroke ca le cabdei li'u

i lu mi mutce le ka nelci la'e di'u sei la alis cusku i ku'i mi za'o na te friti li'u

i lu do mi ba bu'u viska sei le mlatu cu cusku li'u i my canci

i la alis na mutce se spaji la'e di'u ki'u le nu abu ca'o co'a se tcaci le nu loi cizra cu fasnu i ca le nu abu catlu le pu se zvati be my kei my za'ure'u tolcanci

i lu ta'o le cifnu cu mo sei le mlatu cu cusku i mi jibni tolmo'izu'e le nu te preti li'u

i lu ba'o binxo lo xarju li'u smaji se cusku la alis tai da'i lenu my fadni xruti

i lu mi pu jinvi le du'u go'i sei le mlatu cu cusku li'u i za'ure'u canci

i la alis ze'i denpa gi'e xadba pacna lo'e nu za'ure'u viska my i ku'i my na tolcanci i baku za lo mentu be paji'ire abu di'a cadzu fa'a le se cusku se xabju be le cibmasti cicyractu i lu mi pu viska lo'e mapypre sei abu sezysku i le cibmasti cicyractu cu mutce zmadu fi le ka cinri i la'acu'i ki'u le du'u ca mumymasti kei cicy na traji fenki i na tai fenki du'i lo'e nu no'a ca le cibmasti li'u i ca le nu abu cusku di'u kei abu fa'aga'u catlu i le mlatu cu za'ure'u zvati gi'e zutse lo jimca be lo tricu

i lu do cusku zo xarju ji zo narju sei le mlatu cu cusku li'u

i lu mi pu cusku zo xarju sei la alis spuda i au do na za'o suksa canci je tolcanci i do gasnu le nu mutce le ka se cfipu li'u

i lu je'e sei le mlatu cu cusku li'u i caku my masno mutce canci co'a le fanmo be le rebla co'u le nu cisma noi ze'a renvi ba le nu le drata pagbu ba'o canci

i lu ue mi so'iroi viska lo mlatu pe secau lo'e nu cisma sei la alis pensi i ku'i lo nu cisma pe secau lo'e mlatu i traji le ka cizra kei lei se viska be mi bei ze'e le nu mi jmive li'u

i abu ze'unai klama pu le nu viska le zdani be le cibmasti cicyractu i abu jinvi le du'u drani zdani kei ki'u le nu le damtu'u cu tarmi lo'e kerlo kei e le nu le drudi cu se gacri lo'e skapi i le zdani cu tai barda ja'e le nu abu na nelci le nu jbkla pu le nu citka piso'u le zunle spisa be le mledi kei e le nu gasnu le nu abu banro lo mitre be li ji'ipimu iseva'o'ji'asaibo abu toldarsi milxe cadzu fa'a zy gi'e sezysku lu ru'a cicy ca'a traji fenki i aunairu'e mi seba'i pu klama le nu viska le mapypre li'u

8 zemo'o fenki tcati te salci

zemo'o

fenki ke tcati te salci

i lo jubme cu breidi ni'a lo triccu ca'u le zdani i le cibmasti cicyractu ku joi le mapypre cu pinxe lo tcati i lo sipsmacu cu zutse jbbini le remei gi'e carmi sipna i le remei cu pilno sy le nu kicne gi'e vregau lei bircidni sy gi'e tavla simxu ga'u le sy stedu i lu tolkufra mutce ri'i le sipsmacu sei la alis pensi i ku'i pe'i va'o le nu sipna kei sy na se vajni li'u

i le jubme cu barda i ku'i le cimei cu tagji jmaji le kojna be jy i lu canlu nomei i canlu nomei sei le remei ca le nu viska le nu la alis klama cu krixu li'u i lu canlu ba'e za'uraumei sei la alis fengu cusku li'u i abu tsebi'o lo barda birstizu bu'u lo fanmo be le jubme

i lu e'e cpacu lo vanju sei le cibmasti cicyractu cu cusku co zanru li'u

i la alis catlu piro le jubme i ku'i no na'e tcati jy cpana i lu mi na viska lo vanju sei abu piksku li'u

i lu no vy zvati sei cycy cusku li'u

i lu o'onai va'o la'e di'u do na clite le nu friti sei la alis fengu cusku li'u

i lu do na clite le nu tsebi'o secuu le nu se zvacpe sei cycy cusku li'u

i lu mi na pu djuno le du'u le jubme cu me ba'e domoi sei la alis cusku i jy breidi tu'a lo za'usaicimei li'u

i lu le do kerfa cu nitcu le nu katna sei le mapypre cu cusku li'u i my pu ze'u mutce kucli catlu la alis gi'e ca pare'u tavla

i lu ei do cilre le nu na cusku loi prenu pinka sei la alis cusku co junri i mutce tolclite li'u

i le mapypre cu kargau lei kanla ja'e le nu mutce ganra kei ca le nu tirna di'u i ku'i my cusku lu ma te simsa lo'e cipnrkorvi lo'e ciska jubme li'u po'o

i lu ui mi ze'aba se zdile sei la alis pensi i mi gleki le nu co'a retsku loi se manci nabmi i mi jinvi le du'u mi ka'e smadi la'e di'u sei abu bacru jmima li'u

i lu xu do skudji le du'u do jinvi le du'u do ka'e facki le danfu be di'u sei cycy cusku li'u

i lu go'isai sei la alis cusku li'u

i lu ei do cusku le do se skudji sei cycy di'a cusku li'u

i lu mi go'i sei la alis sutra spuda i y ju'oru'e y i mi skudji le mi se cusku i ka'u la'e di'u mintu li'u

i lu na mintu sei le mapypre cu cusku i do du'i ka'e cusku le du'u lu mi viska le mi se citka li'u mintu lu mi citka le mi se viska li'u li'u

i lu do du'i ka'e cusku sei le cibmasti cicyractu cu jmima le du'u lu mi nelci le mi se cpacu li'u mintu lu mi cpacu le mi se nelci li'u li'u

i lu do du'i ka'e cusku sei le sipsmacu noi simlu le ka sipna tavla cu jmima le du'u lu mi vasxu ze'a le nu sipna li'u mintu lu mi sipna ze'a le nu vasxu li'u

i lu ja'a mintu sera'a do sei le mapypre cu cusku li'u icabo le nunsnu cu te denpa i le kansiu cu smaji zutse ze'a lo mentu ca'o le nu la alis pensi piro da poi abu morji ke'a lo'e cipnrkorvi a lo'e ciska jubme zi'e noi na mutce

i le mapypre cu pamoi lei co'u smaji i lu le xomoi be le masti cu detri sei my fa'a la alis cusku li'u i my le junla ba'o cpacu le daski gi'e ca'o xanka catlu gi'e di'inai desygau gi'e jbbipu'i le my kerlo

i la alis ze'i pensi gi'e cusku lu le vomoi li'u
 i lu oiri'e srera la'u lo djedi be li re sei le mapypre cu cusku i mi pu cusku le du'u lo'e
 matne na mapti le minji sei my jmina li'u i my fengu catlu le cibmasti cicyractu
 i lu ra ba'e xagrai lei matne sei cycy cumla spuda li'u
 i lu go'i i ku'i la'a loi ji'a nanba spisa cu nerbi'o sei le mapypre cu pante i einai do ra pu
 setca sepi'o le nanba dakfu li'u
 le cibmasti cicyractu le junla cu jgari gi'e tolgei catlu gi'e jirgau le kabri tcati gi'e rere'u
 catlu i ku'i cycy na kakne co pensi lo se cusku poi xagmau le pamoi pinka po'u lu ga'icu'i
 ra ba'e xagrai lei matne li'u
 i la alis pu ca'o kucli catlu ga'u le cycy janco i lu a'u xajmi junla sei abu te pinka i ue
 jy sinxa le du'u le xokaumoi be le masti cu detri enai ku'i le du'u makau tcika li'u
 i lu ei ki'u ma go'i sei le mapypre cu cusku i xu le ba'e do junla cu sinxa le du'u le
 xokaumoi nanca cu detri li'u
 i lu li'a na go'i sei la alis spuda co mutce sutra i ku'i la'e di'u se krinu le nu ze'u stali fa
 le pa nanca li'u
 i lu mi'u le me ba'e mimoi sei le mapypre cu cusku li'u
 i la alis cinmo le ka mutce se cfipu i le pinka be fi le mapypre cu simlu le ka noda smuni
 ke'a kei gi'e ku'i ja'a lojbo i lu mi na mulno jimpe sei abu serai le ka clite verai lei abu
 selka'e cu cusku li'u
 i lu le sipsmacu za'ure'u sipna sei le mapypre cu cusku li'u i my falcru piso'u glare tcati
 le sy nazbi
 i le sipsmacu cu tolsurla desygau le stedu gi'e cusku secau le nu kargau le kanla kei lu
 li'a li'a i di'usai pu'o pinka fi mi li'u
 i lu xu do ba'o smadi tu'a le manci nabmi sei le mapypre fi la alis cusku li'u
 i lu na go'i i mi te jinga sei la alis spuda i ma danfu li'u
 i lu mi na te sidbo di'u lo ji'asai cmarai sei le mapypre cu cusku li'u
 i lu go'ira'o sei le cibmasti cicyractu cu cusku li'u
 i la alis cu tatpi patyva'u i lu pe'i do ka'e se prali le temci sei abu cusku ta'i lo xagmau
 be le nu xaksu ty ta'i le nu preti fa lo manci nabmi poi na se danfu li'u
 i lu va'oda'i le nu la temci cu slabu do nedu'i mi kei sei le mapypre cusku do na pilno
 zo le le nu cmene ty i zo la mapti li'u
 i lu mi na jimpe le du'u do skudji makau sei la alis cusku li'u
 i lu li'a do na go'i sei le mapypre cu stedu muvgau tolsi'a cusku i la'a do noroi tavla
 ji'asai la temci li'u
 i lu ieru'e sei la alis kajde spuda i ku'i ju'o ei mi darxi do'e le temci ca le nu mi cilre le
 nu se zgike li'u
 i lu ua la'e di'u ve ciksi sei le mapypre cu cusku i ty na nelci lo'e nu darxi i romu'ei le
 nu do ty pendo kei ty gasnu so'a se nelci be do ri'i le junla i mu'a da'i li so ca tcika le nu
 co'a tadni i banzu fa le nu do ja'aru'e stidi fi ty kei le nu le junla mo'u ze'i cukli'u i uo li
 pacipimu ca tcika le nu citka li'u
 to lu au go'i sei le cibmasti cicyractu cu lauble se'isku li'u toi
 i lu la'e di'u da'i banli ju'o sei la alis pensi cusku i ku'i va'oku mi na xagji li'u

i lu ieru'e go'i ca le cfari sei le mapypre cu cusku i ku'i e'e li pacipimu za'ò tcika ze'u lo do se djica li'u

i lu xu la'e di'u tadji le nu ba'e do zuchte sei la alis retsku li'u

i le mapypre cu tolgei desygau le stedu i lu na go'i sei my spuda i mi'a da'arsi'u ca le puzi cibmasti ibazibo ty fenki binxo to'i my pilno le tcati smuci le nu farja'ò cycy toi i fasnu ca le banli ke zgike se tigni be le risna noltruni'u i mi bilga le nu sanga di'e

i gu'irgu'i doi volratcu
i u'e a'u do ma klatcu

i le selsanga do slabu ti'epei li'u

i lu mi pu tirna lo simsa sei la alis cusku li'u

i lu di'a co'e sei le mapypre di'a cusku di'e

i do munje gapru voffi
tcatypalne si'a troffi
i gu'irgu'i

li'u i caku le sipsmacu cu desyzu'e gi'e co'a sanga ca le nu sipna lu gu'irgu'i gu'irgu'i li'u gi'e ze'u za'ò co'e ja'e le nu sarcu fa le nu tunta sy kei le nu stigau sy

i lu no'i mi bazi ba'ò mulgau le pamoi pempau sei le mapypre cu cusku ca le nu le noltruni'u cu zunti gi'e krixu lu ta catra le temci i ko le stedu ta vimcu li'u li'u

i lu oi selte'a cilce sei la alis ki'asku li'u

i lu co'a la'e di'u sei le mapypre di'a tolgei cusku ty na zuchte lo se cpedu be mi i ca ru'i tcika fa li xa li'u

i lo carmi sidbo cu se pensi la alis i lu ua xu la'e di'u krinu le nu so'i ue tcati dacti cu zvati sei abu retsku li'u

i lu ja'a go'i sei le mapypre cusku je va'urpante i ru'i tcika le tcati sanmi i mi'a noroi kakne le nu lumci lei dacti ca le jbini li'u

i lu ja'ò ru'a do za'ò muvdu fo lo cukla sei la alis cusku li'u

i lu sa'e go'i sei le mapypre cusku ca le nu so'ò le dacti mo'u se xaksu li'u

i lu ku'i ma fasnu ca le nu do xruti le cfari sei la alis retsku darsi li'u

i lu e'u mi'ò galfi le se casnu sei le cibmasti cicyractu cu zunti je sipfru i mi ti tatpi i mi sarji le nu da lisri zo'e le citno ninmu mi'a li'u

i lu u'u noda mi slabu sei la alis noi xanka le se stidi cu cusku li'u

i lu va'ò la'e di'u le sipsmacu ba co'e sei le remei cu se krixu i ko cikybi'ò doi sipsmacu li'u i le remei cu tunta sy le re mlana ca le mintu

i le sipsmacu cu masno kargau le kanla i lu mi na pu sipna sei sepi'ò lo rufsu je ruble voksa sy cusku i mi pu tirna ro valsi poi do doi cimei ca'ò cusku li'u

i lu ko te lisri fo mi'a sei cycy cusku li'u

i lu e'ò go'i pe'u sei la alis cpesku li'u

i lu ji'a ko sutra sei le mapypre cu jmina iseva'onaibo do ba sipna pu le nu mulno li'u

i lu puzuvuku ci cmalu mensi zo'u sei le sipsmacu cu mutce sutra tolsisti zo elsis fa'u zo leisis fa'u zo tilis my cmene i my xabju le loldi be lo jinto li'u

i lu ma my cidja sei la alis noi roroi se cinri lo'e du'u citka je pinxe makau cu cusku li'u

i lu lo satyjisra my cidja sei le sipsmacu ba le nu pensi ze'a lo mentu be li paji'ire cu cusku li'u

Most people would interpret that as "about 12 minutes" :-) –adam

i lu ka'u ka'enai go'i sei la alis xendo te pinka i va'oku my bilma li'u

i lu ja'a go'i sei le sipsmacu cu cusku i ba'e mutce le ka bilma li'u

i la alis troci le nu se xanri le nu le tolfadni ke jmive tadjji cu simsa makau i ku'i dukse le ka cfipu abu iseki'ubo abu di'a cusku lu i ku'i ki'u ma my xabju le loldi be lo jinto li'u

i lu ko za'ure'u pinxe lo tcati sei cycy fi la alis mutce junri se cusku li'u

i lu mi noroi pu pinxe sei la alis se cnixai spuda iseni'ibo mi ka'enai za'ure'u go'i li'u

i lu do skudji le du'u do ka'enai ba'e me'ire'u pinxe sei le mapypre cu cusku i frili fa le nu za'unore'u go'i li'u

i lu noda cpedu le ba'e do seljinvi sei la alis cusku li'u

i lu ma cusku loi prenu pinka caku sei le mapypre cu jinga reisku li'u

i la alis na kakne le nu spuda la'e di'u iseki'ubo abu sezyse'u le nu cpacu lo tcati e lo nanba joi matne kei gi'ebabo rere'u te preti fo le sipsmacu fi lu ki'u ma my xabju le loldi be lo jinto li'u

i le sipsmacu za'ure'u pensi ze'a lo mentu be li paji'ire gi'e ba cusku lu jy satyjisra jinto li'u

i lu o'onai no go'i cu zasti sei la alis co'a fengu cusku li'u i ku'i le mapypre e cycy bacru zoi sance c c sance i le sipsmacu cu pante te pinka fi lu va'o le nu do na ka'e clite kei e'e do se'adai mulgau le lisri li'u

i lu na go'i i e'o do ja'a di'a go'i sei la alis mutce cumla cusku i mi na ba za'ure'u zunti i i'a cumki fa le nu ba'e pa go'a cu zasti li'u

i lu zasti ju'o sei le sipsmacu cu se si'arxai cusku li'u i ku'i sy nalpro le nu depsti i lu lei bi'unai ci cmalu mensi noi ta'o cilre le nu te pixra li'u

i lu pixra ma my sei la alis noi ca'o tolmorji le se nupre cu cusku li'u

i lu lo satyjisra sei caku le sipsmacu secau le nu pensi cu cusku li'u

i lu mi djica lo'e jinsa kabri sei le mapypre cu zunti i e'u romi'o movdu le lamji stuzi li'u

i my movdu ca le nu cusku i le sipsmacu my jersi i le cibmasti cicyractu cu movdu le pu se zvati be le sipsmacu i la alis noi banzu naldjica cu basti cycy le ka ce'u zvati makau i le mapypre po'o cu se prali da le nuncenba i la alis se tolprali lo mutce ki'u le nu la cibmasti cicyractu puzi falcru le ladru botpi le cycy palta

i la alis na djica le nu za'ure'u cnixai le sipsmacu gi'eseki'ubo kajde ke tolsti cusku lu mi na jimpe i my cpacu le satyjisra ma li'u

i lu ka'u ka'e cpacu lo'e djacu lo'e djacu jinto sei le mapypre cusku isi'a li'a ka'e cpacu lo'e satyjisra lo'e satyjisra jinto vau iepi doi bebna li'u

i lu ku'i my ba'e nenri le jinto sei la alis fi le sipsmacu cu cusku co naljundi be le romoi pinka li'u

i lu li'a go'i sei le sipsmacu cu cusku i jinto nenri li'u

i le danfu cu mutce cfipu la alis uu ja'e le nu curmi le nu le sipsmacu ca'o co'e ze'a le nu abu na zunti

i lu my ca'o cilre le nu te pixra sei le sipsmacu di'a co'e li'u i sy sipfru gi'e mosra lei sy kanla ki'u le nu co'a sipydji i lu my te pixra so'i klesi be lei dacti i ro da poi zo my pamoi lei cmene be ke'a lerfu li'u

i lu ki'u ma zo my sei la alis cusku li'u

i lu ki'u ma naku da'i sei cycy cusku li'u

i la alis cu smaji

i le sipsmacu ba'o ga'orgau lei kanla ca la'e di'u gi'e ca'o co'a sipna i ku'i ca le nu se tunta le mapypre kei sy za'ure'u cikybi'o gi'e cmalu krixaxa gi'e di'a cusku lu li'o poi zo my pamoi lei cmene be ke'a lerfu i mu'a lo mirli terkavbu e lo mluni e lo mojrango e lo mutce i ka'u da ka'e mutce lo mutce i xu do su'oroi viska lo pixra be lo mutce li'u

i lu je'u uaru'e sei la alis mutce se cfipu cusku mi na jinvi li'u

i lu ei va'o la'e di'u do na tavla sei le mapypre cusku li'u

le di'u se tolclite cu zmadu le sarji selka'e be la alis i abu selrigni gi'e sa'irbi'o gi'e to'o cadzu i le sipsmacu cu ze'i sipybi'o i no le re drata cu jundi le nu abu cliva i abu paji'ireroi trixe catlu fi'o xadba se pacna le nu le remei cu klacpe abu i ca le nu abu roroi viska kei le remei cu troci le nu setca le sipsmacu le tcati patxu

i lu ai mi noroi za'ure'u klama ba'e tu sei la alis ca le nu pluta sisku pa'o le ricmei cu cusku i traji le kambabna lei tcati te salci poi mi zvati ca le nu mi jmive li'u

i ca le nu cusku di'u kei abu co'a sanji le nu pa le triccu cu ve vorme le ty nenri i lu cizra sei abu pensi i ku'i ro da cizra ca le cabdei i pe'i ai mi cazi nerkla li'u i abu nerkla

i abu za'ure'u zvati le clani kumfa gi'e jibni le cmalu ke blaci jubme i lu e'e mi xagmau snada ca le ca krefu sei abu se'isku li'u i pamai abu jgari le cmalu ke solji ckiku gi'e telcaugau le vorme be le purdi i remai abu co'a citka le mledi noi pu punji lo spisa be ke'a le daski ku'o co'u le nu cenmitre li ji'icino i cimai abu cadzu pa'o le cmalu vorlu'a i ba'e romai uo abu zvati le melbi purdi gi'e jbini lei carmi ke xrula zdani e lei lenku milxe jaurjinto

9 bimo'ò [noltruni'u kelcrkroke bo foldi]

noltruni'u kelcrkroke bo foldi

i lo barda ke rozgu tricú cu jibni le vorme be le purdi i le rozgu poi xrula ty cu blabi i ku'i ci purdykurji cu cintypunji ry ja'e le nu xunre i la alis cu pensi jivni le du'u mutce cizra kei gi'e jbimaukla tezu'e le nu catlu kei gi'e tirna ca le nu ba'o klama kei le nu pa le purdykurji cu cusku lu o'i doi mum ko na renro lo cinta mi li'u

i lu oi mi pu ka'enaí rivbi sei la mum cusku i la zel catke le mi cidni li'u

i ca la'e di'u la zel galcatlu gi'e cusku lu e'e doi mum ko roroi zungygau lo drata li'u

i lu ei ba'e do na tavla sei la mum cusku i ti'e le noltruni'u cu xusra ca le purlamdei le du'u ei vimcu le stedú do li'u

i lu ma krinu sei le tavla pamoi li'u

i lu la'e di'u ba'e do na cuntú doi rel sei la zel cusku li'u

i lu ba'e ja'a go'i sei la mum cusku i mi ta jungau i krinu fa le nu sabji loi tulji genja enaiba'ibo loi sluni le jukpa li'u

i la zel bikygau le burcu gi'e co'a cusku lu ua verai lei ro toldra li'u icabo le zy kanla cu cunso se farna la alis noi sanli gi'e catlu lei purdykurji i zy ze'i sezyzunti i lei ji'a drata cu trixe catlu i ro py dizlo krobi'o

i lu e'o do mi jungau sei la alis toldarsi milxe cusku le du'u ki'u ma do cintypunji lei va rozgu li'u

i la mum e la zel cusku noda gi'e catlu la rel i la rel co'a kandi voksa cusku lu je'u sa'u doi citni'u ei ti ba'e xunre rozgu tricú i mi'a pu srera le nu sombo lo blabi i va'o le nu le noltruni'u cu facki la'e di'u kei ro mi'a ba katna te vimcu le stedú i to'u sa'u doi citni'u mi'a zukte le mi'a xagrai pu le nu ny klama li'u i caku la mum noi pu ca'o xanka catlu le purdi cu krixá lu le noltruni'u i le noltruni'u li'u i le ci purdykurji cu sezre'o ja'e le nu le flira cu cpana le loldi i da sance so'i nu stapa i la alis cu sruri catlu gi'e djica le nu viska le noltruni'u

i klama pamoi fa pano sonci noi bevri loi grana i sy mintu lei purdykurji le ka makau tarmi ce'u kei no'u le ka ce'u clani kurfa gi'e plita gi'e se kojna le xance e le jamfu i jersi fa lei pano nolkansa noi ricfu se jadni lei tabjme gi'e remei cadzu du'i tu'a lei sonci i jersi fa lei noltru panzi noi panomei i lei emalu dirba cu gleki plipe klama co xance jgari remei i roboi py se jadni loi risna i jersi fa lei vitke i so'eboi vy cu noltrunau gi'a noltruni'u i la alis fakvyi'a le blabi ractu noi jbini vy i ry sutra je xanka tavla gi'e cisma frati ro se cusku gi'e pagre klama secau le nu sanji abu i jersi fa le risna nolsé'u noi bevri le noltrunau mapku sepi'o lo zirxu'e ranbu'u kicne i romoi be le banli dzupoi fa le noltrunau kujoi le noltruni'u vu'ope lo'e risna

i la alis cu senpi le du'u xukau ei cnita flira vreta tai tu'a lei ci purdykurji i ku'i abu na morji le du'u ti'e la'e di'u dzupoi javni i lu ji'a ma ma prali lo dzupoi sei abu pensi va'o le nu ei ro da cnita flira vreta ja'e le nu ka'enaí viska dy li'u iseki'ubo abu sanli le abu se zvati gi'e denpa

i ca le nu le dzupoi cu crane la alis kei roda sisti gi'e catlu abu i le noltruni'u cu junri cusku lu ti mo li'u i ny di'u cusku le risna nolsé'u noi spuda fi le nu po'o krobi'o je cisma

i lu doi bebna sei le noltruni'u cu sutydji cusku li'u i fa'a la alis ny di'a cusku lu ma do cmene doi verba li'u

i lu zo alis mi emene doi banli nobli sei la alis clite mutce cusku li'u i ku'i abu jmina sezysku lu ua ta karda ga'i romei i ei mi na terpa li'u

i lu ba'e ti mo sei le noltruni'u cu farja'o be lei ci purdykurji noi vreta ru'u le rozgu tricu be'o cusku li'u i ca le nu py cnita flira vreta kei ki'u le nu le morna be le trixe cu mintu le me ro drata moi kei ny ka'enai djuno le du'u py purdykurji gi'ikau sonci gi'ikau nolkansa gi'ikau panzi be ny cimei

i lu a'ucu'i sei la alis noi se spaji le nu abu darsi cu cusku i na cuntu ba'e mi li'u

i le noltruni'u cu binxo lo xunzi'u seri'a le nu fengu i ba le nu catlu abu zi lo mokca tai tu'a lo cilce danlu kei ny krixu lu ko le stedu ta vimcu i ko li'u

i lu nonselsmu sei la alis cladu je birti cusku li'u i le noltruni'u cu smaji

i le noltrunau cu punji le xance le birka be le noltruni'u gi'e toldarsi cusku lu ko pensi doi dirba le nu ta verba li'u

i le noltruni'u cu torni to'o le noltrunau gi'e cusku lu ko ta fa'ergau li'u le nelse'u

i le nelse'u cu kurji mutce co'e sepi'o lo jamfu

i lu ko sanli sei le noltruni'u cu cpina je cladu voksa cusku li'u i le ci purdykurji ze'i sa'irbi'o gi'e co'a korcu rinsa le noltrunau e le noltruni'u e le noltru panzi e ro drata

i lu ko ta sisti sei le noltruni'u cu krixu i do mi tolylaxygau li'u i fa'a le rozgu tricu ny di'a cusku lu do ma ca'o vi zukte li'u

i lu doi banli nobli sei la rel ca le nu cpanyngau lo cidni le foldi cu cumla mutce tonga cusku i mi'a troci li'u

i lu je'e li'a sei le noltruni'u noi pu ca'o lanli lei rozgu cu cusku i ko le stedu ta vimcu li'u i le dzupoi cu di'a muvdu i ci le sonci cu stali mu'i le nu selmidycatra lei mabla selfu'a purdykurji noi bajra fa'a la alis mu'i le nu se marbi

i lu do le stedu na ba te vimcu sei la alis cusku li'u i abu punji py lo barda ke xrula patxu noi vi zvati i le ci sonci cu sruri klama je sisku ze'a lo mentu be li paji'ire gi'ebabo smaci jersi lei drata

i lu xu le stedu ba'o se vimcu sei le noltruni'u cu krixu li'u

i lu le stedu ba'o canci doi banli nobli sei lei sonci cu spuda krixu li'u

i lu drani sei le noltruni'u cu krixu i xu do ka'e kelckroke li'u

i lei sonci cu smaji gi'e catlu la alis seki'u le nu li'a di'u preti fo abu

i lu go'i sei la alis krixu li'u

i lu e'e ja'o sei le noltruni'u cu camki'a li'u i la alis jorne le dzupoi gi'e kucli le du'u makau ba fasnu

i lu y melbi i y melbi djedi sei lo mutce toldarsi se voksa ne'a abu cusku li'u i abu ca'o cadzu re'o le blabi ractu noi ze'i catlu le abu flira

i lu mutce sei la alis cusku i la noltruni'u ma zvati li'u

i lu o'i o'i sei le ractu cu lauble je sutra tonga cusku li'u i ry xanka catlu ga'u le janco ca le nu tavla kei gi'e sezgalgau co cpana lei jmadegji gi'e jbigau le moklu le abu kerlo gi'e lauble cusku lu ri ba se selmidycatra li'u

i lu ma krinu sei la alis cusku li'u

i lu xu do pu cusku lu mi kecti li'u sei le ractu cu retsku li'u

i lu na go'i sei la alis cusku i mi nasai kecti i mi pu cusku lu ma krinu li'u li'u

i lu ra darxi lei kerlo be le noltruni'u sei la ractu co'a cusku li'u i la alis emila krixax i lu o'i sei la ractu cu terpa tonga laurblesku i le noltruni'u do ba tirna i no'i ra pu lerci klama i le noltruni'u cu cusku li'u

i lu ko zvati le medomoi sei le noltruni'u cu lidvru voksa cusku li'u i lei prenu co'a bajra fa'a roda gi'e jalsi'u i ku'i bredi zi lo mentu be li paji'ire i le nu kelci cu cfari i la alis jinvi le du'u noroi le nu jmive kei pu viska lo tai kelckroke foldi i cpana joi skuro i le bolci cu jmive jesymabru i le mruli cu jmive fagycpi i le sonci cu krosa'ibi'o fi lei xance ku joi lei jamfu ja'e le nu bargu

i le ralju be lei nandu be la alis ca le cfari cu nu jitro le fagycpi i abu snada le nu kufra banzu punji le fy xadni noi le tuple cu dandu ku'o le cnita be le abu birka i ku'i ta'e ca le nu ge le cnebo mo'u sirji gi abu bredi le nu darxi le jesymabru le fy stedu kei fy torni gi'e catlu fa'a le abu flira gi'e se cfipu frumu ja'e le nu abu ka'enai rivbi le nu spoja emila i ca le nu abu ba'o punji le fy stedu le dizlo gi'e pu'o za'ure'u co'a co'e cu xajmi mutce fa le nu facki le du'u le jesymabru pu nalbolbi'o gi'e ca'o klama lo darno i ji'a ta'eku lo cmana a lo skuro cu zunti ca le nu abu djica le nu benji le jesymabru i ki'u le nu le korcu sonci roroi sa'irgau gi'e dzukla lo drata pagbu be le foldi kei la alis jivbi'o le du'u le nunkei ja'a mutce le ka nandu

i ro le kelci cu kelci ca le mintu gi'e na denpa le me ky moi gi'e ru'i toltugni gi'e damba fi lei jesymabru i baziku le noltruni'u cu fengu cinmo gi'e ca'o marxa cadzu gi'e krixax lu ko le stedu ta vimcu li'u a lu ko le stedu tu vimcu li'u ji'iparoi ro mentu

i la alis co'a cinmo le ka tolkufra i i'a abu za'o na damba le noltruni'u gi'e ku'i djuno le du'u ka'e bazi fasnu i lu va'o la'e di'u sei abu pensi mi mo i vi nelci lo'e nu vimcu lo'e stedu lo'e prenu i manci mutce fa le nu da stali le ka jmive li'u

i abu sisku lo'e tadji be le nu zi'erbi'o kei gi'e pensi le du'u xukau abu ka'e cliva secuu le nu se viska kei kei gi'e co'a sanji lo cizra tolcanci ne le vacri i ra cfipu abu ca le cfari i ku'i ba le nu catlu ra ze'a lo mentu be li paji'ire kei abu facki le du'u ra nu cisma kei gi'e sezysku lu ua le tcicymlatu i caku mi da ka'e tavla li'u

i lu do mo sei le mlatu ca le nu da tavla banzu moklu cu cusku li'u

i la alis denpa le nu lei kanla cu tolcanci gi'e tu'ifru i lu na prali fi le nu tavla ta kei sei abu pensi pu le nu zvati fa le kerlo ado'anai su'o ri li'u i za lo drata mentu le mulno stedu cu tolcanci i la alis toljgari le fagycpi gi'e co'a te lisri le nunkei gi'e cinmo le ka gleki le nu da abu tirna i le mlatu cu simlu le ka jinvi le du'u pirau my ca se viska i no drata pagbu be my cu tolcanci

i lu mi na jinvi le du'u tu ca'o stace kelci sei la alis co'a pante tonga cusku i ro tu da'arta'a ja'e le nu na ka'e tirna le nu tavla i tu simlu le ka na steci javni fi ce'u ija do'anai va'o le nu ja'a javni kei no da jy jundi i do na se xanri le du'u tai makau cfipu fa le du'u ro le dacti cu jmive i mu'a le bargu poi ei mi ca pagre cu co'a cadzu le drata fanmo be le foldi i mi pu'o darxi le jesymabru pe le noltruni'u ije ku'i ue jy to'o bajra ca le nu viska le nu le memimoi cu jbikla li'u

i lu do nelci le noltruni'u sela'u ma sei le mlatu cu lauble voksa cusku li'u

i lu li no sei la alis cusku i ny mutce li'u icaku abu sanji le nu le noltruni'u cu jibni trixe abu gi'e tirna i seki'ubo di'a cusku lu le ka lakne fa le nu ce'u jinga iseki'ubo na vamji le temci fa le nu mo'u kelci li'u

i le noltruni'u cu cisma gi'e pagre
i do ma tavla sei le noltrunau cu cusku li'u i ny klama la alis gi'e mutce se cinri catlu le stedu be le mlatu
i lu ta mi pendu i ta tcicymlatu sei la alis cusku i e'apei mi do ta pengau li'u
i lu mi nasai nelci le nu ta simlu makau sei le noltrunau cu cusku i ku'i e'a ta cinba le mi xance va'o le nu pluka ta li'u
i mi zmanei le nu na go'i sei le mlatu cu te pinka li'u
i lu ko na tolsi'a sei le noltrunau cu cusku i ko mi na catlu tai ta li'u i ny klama le trixe be la alis ca le nu tavla
i lu lo'e mlatu ka'e catlu lo'e noltrunau sei la alis cusku i mi pu tcidu di'u lo cukta i ku'i mi na morji le du'u cy mokau li'u
i lu ei ta se vimcu sei le noltrunau cu jdice cusku li'u i ny skuta'a le noltruni'u noi ca jibni pagre lu au doi dirba do da vicygau le vi mlatu li'u
i le noltruni'u cu cikre ta'i pada ro nabmi noi barda ja cmalu i lu ko le stedu ta vimcu sei ny secou le nu fa'a catlu cu cusku li'u
i ba'e mi klagau le selmi'ecatra sei le noltrunau cu sutydji cusku li'u i ny sutra klama
i la alis cu jdice le nu xruti gi'e viska le nu le nunkelci cu mokau icabo abu tirna le darno voksa be le nolturni'u noi cinmo krixa i abu ba'o tirna le nu ny minde le nu ci kelci cu se catra ki'u le nu ky na kelci ca le me ky moi i abu na nelci le jvinu be le cuntu ki'u le nu le nunkelci cu mutce le ka cfipu kei ja'e le nu abu noroi djuno le du'u xukau ca ei kelci i seki'ubo abu co'a sisku le abu jesymabru
i le jesymabru ca'o damba lo drata jesymabru i la alis jinvi le du'u la'e di'u xautce le nu kelcrkroke darxi pa cy le drata i le po'o nabmi cu nu le abu fagyepi ba'o klama le drata fanmo be le purdi be'o noi la alis viska le nu bu'u ke'a fy tolsnada troci le nu volkla lo tricu
i ca le nu abu le fagyepi ba'o kavbu gi'e xrugau kei ge le nundamba cu mulno gi lei re jesymabru na se viska i lu ku'i na vajni mutce sei la alis pensi i ro le dargu cu canci le vi mlana be le foldi li'u i abu punji fy le cnita be le abu birka ja'e le nu na ka'e za'ure'u cliva kei gi'e xruti le nu jmina tavla le pendu
i ca le nu ba'o xruti tu'a le tcicymlatu kei spaji abu fa le nu facki le du'u lo prenu so'imei ba'o jmaji le sruri be ty i da'arsi'u fa le selse'icatra ku joi le noltrunau ku joi le noltruni'u vu'o noi ro lu'a ke'a cu tavla ca le mintu ca le nu ro drata cu smaji mutce gi'e tolkufra simlu
i ca le nu la alis tolcliva kei abu te cpedu le nu jdice le cuntu kei ro lu'a le cimei i ku'i ki'u le nu ro ri tavla ca le mintu kei abu mutce le ka se nandu le nu jimpe le du'u makau se cusku
i le selse'icatra seldau zo'u ka'enai katna vimcu lo stedu secou lo'e nu da poi xadni zo'u ka'e katna vimcu le stedu da i sy noroi pu zunkte lo simsa i ai na co'a go'i ca le sy ca nunjmive pagbu
i le noltrunau seldau zo'u ro da poi ke'a se stedu zo'u da ka'e sedycaugau i ei na cusku lo nonselsmu
i le noltruni'u seldau zo'u va'o le nu da na se zunkte sera'a le cuntu zi lo mleca be lo temci pinosi'e kei gau ny ro da ba se selse'icatra to le romoi pinka cu rinka le nu piro le kansiu cu simlu le ka mutce le ka junri je xanka toi

i la alis ka'e pensi le nu cusku no na'e bo lu ta se ponse le noltroni'u i e'u preti ta ko ba'e ny li'u

i lu ny pinfu sei le noltruni'u fi le selse'icatra cu cusku i ko ny ti klagau li'u i le selse'icatra cu klama tai tu'a lo danti

i le stedu be le mlatu co'a kadze'a ca le nu sy cliva kei gi ba'o mu'o canci ca le nu sy xruti co kansa be le noltroni'u iseki'ubo le noltrunau e le selse'icatra cu cilce bajra gi'e sisku my ca le nu lei drata cu di'a kelci

10 somo'o lisri fi la jitfa cakyrespa

somo'o

lisri fi le jitfa cakyrespa

i lu do ka'ennai pensi le nu sela'u makau mi gleki le nu mi do za'ure'u viska doi dirba slabu sei le noltroni'u cu cusku li'u i ny xendo tagygau le ny birka le me la alis moi i ny joi abu kansu'u le nu cadzu cliva

i la alis mutce gleki le nu zgana le nu ny pluka tarti i abu pensi le du'u ju'ocu'i le tsaprpiperi cu rinka le nu ny cilce ca le nu abu penmi ny le jupku'a

i lu ca le nu ba'e mi noltroni'u kei sei abu to sepi'onai ku'i lo pajna mutce tonga toi sezysku nosai tsaprpiperi ba zvati le mi jupku'a i lo'e stasu cu xamgu secou i cumki fa le nu roroiku lo tsaprpiperi cu rinka le nu lei prenu cu cpina tarti sei abu mutce se pluka be le nu facki lo cnino javni i lo sarvanju cu rinka le nu py slari tarti i lo spatrkamomili cu rinka le nu py kurki tarti i y i lo bavmi sukta a lo simsa cu rinka le nu lei verba cu titla tarti i au lo'e prenu cu djuno la'e di'u ja'e le nu py na mobdu'a sy li'u

i caku abu nalmorji fi le noltroni'u gi'e milxe se spaji ca le nu tirna le ny voksa noi jibni le abu kerlo i lu do da pensi doi dirba i la'e di'u rinka le nu do tolmo'i le nu ei tavla i mi ka'ennai ca cusku le sedu'u la'e di'u makau madni'i i ku'i mi bazi morji li'u

i lu ju'ocu'i madni'i noda sei la alis darsi te pinka li'u

i lu e'i doi verba sei le noltroni'u cu cusku roda de madni'i i sarcu fa le nu facki li'u i ny la'irze'a la alis ca le nu tavla

i la alis na mutce nelci le nu tai jibni ny gepamai ki'u le nu le noltroni'u cu mutce le ka tolmelbi giremai ki'u le nu ny satci galtu mapti le nu vregau le firji'o le abu janco i se tolkufra kinli firji'o i ku'i abu na nelci le nu tolclite iseki'ubo abu renvi serai le ka xamgu kei verai lei selka'e be abu

i lu le ca nunkei ca'o xagmau sei abu seta'i le nu stogau le nunsnu cu cusku li'u

i lu ie go'i sei le noltroni'u cu cusku i la'e di'u madni'i la'e lu u'e nu prami i le nu prami cu rinka le nu le munje cu carna li'u li'u

i lu ti'e rinka sei la alis lauble cusku fa le nu roda jundi le cuntu be da li'u

i lu i'a a'unai mintu fi le ka smuni sei le noltroni'u noi ca'ergau le kinli je cmalu firji'o le janco be la alis cu cusku i la'e di'u madni'i la'e lu ko kurji le smuni ise'va'obo le sance ri kurji li'u li'u

i lu ua ti nelci le nu facki le du'u makau se madni'i roda sei la alis pensi li'u

i lu ju'o do pensi sezretsku le du'u makau krinu le nu mi na srupunji le mi birka le do xadmidju sei ba lo nundenpa le noltroni'u cu cusku i krinu fa le nu mi na'e lacri le do fagyrcpi le nu tarti i e'upei mi troci le nu cipra li'u

i lu cumki fa le nu fy batci sei la alis noi nasai xankyrcpi le nu troci le nu cipra cu spuda li'u

i lu je'usai sei le noltroni'u cu cusku ge lo'e fagyrcpi gi lo'e sansrmustardo cu batci i la'e di'u madni'i la'e lu lo'e cipni poi pimlu dunli cka'ji cu roroi jma'ji li'u li'u

i lu ku'i lo'e sansrmustardo na cipni sei la alis te pinka li'u

i lu drani uecu'i sei le noltroni'u cu cusku i i'o le nu do cusku cu klina le nu jimpe li'u

i lu sy kunra ba'e pe'i sei la alis cusku li'u

i lu li'a go'i sei le noltroni'u noi simlu le ka bredi le nu tugni la alis roda cusku i lo barda ke sansrmustardo terkunra vi jibni i la'e di'u madni'i la'e lu lo'e nu lo memimoi cu zenba cu panra lo'e nu lo medomoi cu jdika li'u li'u

i lu ua ka'u sei la alis noi na jundi le romoi pinka cu krisku i sy stagi i sy le ka go'i cu na catlu gi'eku'i ja'a ckaji li'u

i lu mi do ja'asai tugni sei le noltroni'u cu cusku i la'e di'u madni'i la'e lu ko ckaji le se simlu be do li'u i va'i sa'u lu ko noroi se xanri le nu do na ckaji na'eboda poi do simlu fi lei drata fe le ka de poi do ca'a ja nu'o ckaji ke'a na drata di poi do simlu ke'a lei drata lo drata li'u li'u

i lu pe'i mi ka'e xagmau jimpe la'e di'u sei la alis clite mutce cusku va'o le nu ciska i ku'i mi ka'enai jimpe ca le nu do cusku li'u

i lu di'u nova'e ci'u lei mi ka'e se cusku be va'o le nu mi cuxna sei le noltroni'u cu se pluka tonga spuda li'u

i lu e'o ko ko na raktu le nu cusku sepi'o lo clamau sei la alis cusku li'u

i lu o'a na raktu sei le noltroni'u cu cusku i mi dunda ro ca ba'o se cusku be mi do li'u

i lu tolkargu seldunda sei la alis pensi i mi gleki le nu na ta'e tai dunda ca le jbedetri te salci li'u i ku'i abu na darsi le nu cladu cusku

i lu xu za'ure'u pensi sei le noltroni'u ca le nu za'ure'u ca'ergau le kinli je cmalu firji'o cu te preti li'u

i lu mi zifre le nu pensi sei la alis noi co'a xanka cu kinli cusku li'u

i lu du'i le nu zifre sei le noltroni'u cu cusku fa lo'e xarju le nu voffi i la'e di'u madni'i li'u

i caku ja'e le nu la alis se spaji mutce kei le voksa be le noltroni'u cu canci caji'asai le midju be le ny se nelrai valsi no'u zo madni'i i le birka poi jorne le abu birka cu co'a desku i la alis catlu i le noltruni'u cu sanli ca'u la alis joi le noltroni'u gi'e lindi frumu

i lu xangu donri doi nolba'i sei le noltroni'u co'a lauble je ruble voksa cusku li'u

i lu o'i pa'e sei le noltruni'u ca le nu darxi le loldi le jamfu cu krixax do a le do stedu cu ei se vimcu i go'i ze'i pimu lo temci nomei i ko cuxna li'u

i le noltroni'u cu cuxna gi'e zi ba'o cliva

i lu e'u mi'o di'a kelci sei le noltroni'u fi la alis cusku li'u i la alis cu dukse le ka terpa gi'e cusku no valsi gi'eku'i masno jersi ny fa'a le kelcrkroke foldi

i lei drata vitke cu se prali le nu surla bu'u le ctino kei le nu le noltruni'u cu nalzvati i ku'i ca le nu viska ny kei vy zi sutra le nu xruti le nu kelci i le noltruni'u cu te pinka le po'o du'u lo mokca nunlerci cu se jdima lei vy nunjmive

i ze'a piro le nu kelci kei le noltruni'u noroi de'a damba lei drata kelci gi'e noroi de'a krixax lu ko le stedu ta vimcu li'u a lu ko le stedu tu vimcu li'u i lei se dapma be ny cu se klagau lei sonci noi li'a de'a bargu i ba za lo cacra be li ji'ipimu ge no bargu cu zvati gi ro le kelci po'u na'eboda le noltrunau a le noltruni'u a la alis cu pinfu gi'e se dapma fi le nu se selmi'ecatra

ibabo le noltruni'u cu tatpi cliva gi'e cusku fi la alis fe lu xu do pu viska le jitfa cakyrespa li'u

i lu na go'i sei la alis cusku i mi na djuno ji'asai le du'u makau jitfa cakyrespa li'u

i lu le te zbasu be lo'e jitfa cakyrespa bo stasu sei le noltruni'u cu cusku li'u

i mi pu noroi ga viska cy gi se tavla fi cy sei la alis cusku li'u

i lu e'e mi'o klama sei le noltruni'u cu cusku i ba lisri cy boi cy do li'u

i ca le nu cliva cadzu kei la alis tirna le nu le noltrunau cu lauble voksa cusku fi lei zvati fe lu ro do se fraxu li'u i lu ri'e la'e ba'e di'u xangu sei abu sezysku i abu pu cinmo le nu tolgleki le nu le noltruni'u cu minde xokau nuncatra

i bazibo penmi le cpicinfo noi sipna mutce vreta le se solgu'i to e'u ko va'o le nu na djuno le du'u makau cpicinfo cu catlu le pixra toi i lu ko sanli doi lazni sei le noltruni'u cu cusku i ko klagau le vi citno ninmu le nu viska le jitfa cakyrespa gi'e tirna le cy lisri i ei mi xruti gi'e jitro so'o nuncatra noi mi minde li'u i ny cadzu cliva la alis noi stali le cpicinfo i la alis na mutce le ka nelci le jvinu be le danlu i ku'i abu pensi le du'u se snura dunli fa le nu stali cy kei le nu jersi le cilce noltruni'u i seki'ubo abu denpa

i le cpicinfo cu tsebi'o gi'e mosra lei kanla gi'ebabo catlu le noltruni'u co'u le nu ny na ka'e se viska kei gi'ebabo cmila i lu u'i sei le cpicinfo fi pimumai cy e pimumai la alis cusku li'u

i lu u'i ba'e mo sei la alis cusku li'u

i lu ue tu sei le cpicinfo cu cusku i roda tu xanri i ju'o noroi selse'icatra da i ei klama li'u

i lu roda cusku zo ei bu'uku sei la alis ca le nu masno jersi cy cu pensi i mi pu tai se minde noroi le nu mi jmive li'u

i pu le nu darno klama kei viska le jitfa cakyrespa noi zu badri je nonkansa zutse lo cmalu ke rokeci ctebi i ca le nu jbkla kei la alis tirna le nu jycy vruva'u tai le nu mutce badri i abu carmi le ka kecti jycy i lu tu ma badri sei abu fi le cpicinfo cu retsku li'u i le cpicinfo cu spuda sepi'o lei valsi poi jibni mintu lei pu valsi ku'o lu roda tu xanri i ju'o tu node badri i ei klama li'u

i klama le jitfa cakyrespa noi catlu sepi'o loi barda je selkakclu kanla gi'eku'i cusku noda

i lu le vi citno ninmu zo'u sei le cpicinfo cu cusku ti djica le nu djuno fi le do lisri i go'i li'u

i lu mi ti ly tavla sei le jitfa cakyrespa cu condi je kunti tonga cusku i e'u le re do tsebi'o gi'enai cusku lo valsi pu le nu mi mo'u co'e li'u

i le remei cu tsebi'o i no da tavla ze'a lo mentu be li so'o i la alis pensi lu mi na jimpe le du'u ta ka'e mo'u co'e ta'i makau va'o le nu na co'a co'e li'u gi'eku'i tolxanka denpa

i lu puku sei le jitfa cakyrespa cu condi vruvasxu cusku mi jetnu cakyrespa li'u

i lei di'u valsi cu se jersi lo nu ze'u smaji noi zunti ke'a fa po'o le ru'inai me zo xyjckryrx se krixu be le cpicinfo e le ru'i tilju nunvruvasxu be le jitfa cakyrespa i la alis pu'o sa'irbi'o je cusku lu ki'e doi prenu mi do ckire le do cinri lisri li'u gi'e ku'i na ka'e rivbi le nu pensi le du'u ei daji'a jersi i seki'ubo abu smaji zutse gi'e cusku noda

i lu ca le nu mi'a cmalu sei le jitfa cakyrespa noi ca surla zenba gi'e ku'i ru'inai za'o milxe vruvasxu cu di'a cusku mi'a ve ckule le xamsi i le ralju cu junri ke tolcitno cakyrespa gi'e se emene lu ractu cafmi'a li'u mi'a li'u

i lu ki'u ma do'o te emene ra lu ractu cafmi'a li'u va'o le nu ra genai ractu ginai cafmi'a sei la alis te preti li'u

i lu mi'a te cmene ra lu ractu cafmi'a li'u ki'u le nu ra ctuca mi'a sei le jitfa cakyrespa cu fange cusku i je'u do bebna mutce li'u

i lu ei do ckeji le nu cusku lo tai sampu preti sei le cpicinfo cu jmina cusku li'u ibabo le remei cu smaji zutse gi'e catlu la alis uu noi cinmo le nu breidi le nu se tunlo le terdi ibazubo le cpicinfo cu cusku fi le jitfa cakyrespa fe lu e'e doi slabu ko na co'e ze'a piro le donri li'u i jycy di'a cusku di'e

i lu re'u mi'a te ckule le xamsi iju do la'e di'u na krici li'u

i lu mi noroi cusku le sedu'u mi na go'i sei la alis cu zunti li'u

i lu do ja'a go'i sei le jitfa cakyrespa cu cusku li'u

i lu ko ri'urgau le tance sei le cpicinfo pu le nu la alis ka'e za'uroi tavla cu jmina cusku li'u i le jitfa cakyrespa cu di'a co'e

i lu mi'a cilre fu le xagrai i je'u mi'a zvati le ckule ca ro donri li'u

i lu mi ji'a zvati lo donri ckule sei la alis cusku i ei do na tai jgira li'u

i lu xu cilre fi le seljmina sei le jitfa cakyrsapa cu xanka milxe retsku li'u

i lu go'i sei la alis cusku i mi'a cilre fi le fasybau e le zgike li'u

i lu e xu le nu lumci sei le cakyrespa cu cusku li'u

i lu li'a na go'i sei la alis fengu cusku li'u

i lu ua le medomoi na mutce le ka xamgu ckule sei le jitfa cakyrespa cu surbi'o mutce tonga cusku i le dejnoi be fi le memi'amoii cu se fanmo lu le fasybau e le zgike ba'e e le nu lumci cu seljmina li'u li'u

i lu do na mutce le ka nitcu sei la alis cusku va'o le nu xabju le xamsi loldi li'u

i lu mi na kakne le nu pleji sei le jitfa cakyrespa cu vruvasxu cusku i mi cilre le po'o fadni li'u

i lu fy mo sei la alis retsku

i lu li'a pamai nu ctidu'e gi'e ci'iska sei le jitfa cakyrespa cu spuda i remai le vo pagbu be le nacycmaci be'o no'u le nu jmina'e e le nu vimcu'a e le nu pilji'e e le nu fende'a li'u

i lu mi na jimpe fi zo jmina'e sei la alis cusku darsi i ki'a li'u

i le cpicinfo cu spaji lafti le re xance i lu ue paunai xu na jimpe fi zo jmina'e sei cy ki'asku i ru'a je'upei do jimpe fi zo natfe li'u

i lu go'i sei la alis senpi cusku i le du'u da de natfe cu se smuni le du'u da onai de jetnu li'u

i lu ja'o sei le cpicinfo di'a cusku do natfe jimpe i do ja'a bebna va'o le nu do na jimpe natfe jimpe li'u

i la alis na darsi le nu za'ure'u te preti la'e di'u i abu fa'a le jitfa cakyrespa cu cusku lu do cilre fi ma ji'a li'u

i lu le cerdyske sei le jitfa cakyrespa noi kancu lei seltadni sepi'o lei limna'i cu cusku i le cerdyske no'u le prutce e le cabna ge'u e le xasyske i ji'a le nu pixra'i zo'u le pixra'i ctuca cu tolici'o sincyfi'e noi zvati paroi ro jeftu i ctuca fo le nu pixra'i gi'e grasu'u cintai finti li'u

i lu a'u la'e di'u mo sei la alis cusku li'u

i lu ba'e mi ka'enai jarco sei le jitfa cakyrespa cu cusku i mi dukse le ka tinsa i ji'a le cpicinfo noroi cilre li'u

i lu claxu lo'e temci sei le cpicinfo cu cusku i mi zvati le dzeklu ctuca i ri tolci'o xasyjukni i go'i li'u

i lu mi ri noroi zvati sei le jitfa cakyrespa cu vruvasxu cusku i ri ctuca fo ti'e le nu clacmo gi'e geisto li'u

i lu go'i i go'i sei le cpicinfo noi ji'a vruvasxu cu cusku li'u i le re danlu cu gairgau le vo'a xance le vo'a flira

i lu pau do cilre ca ro donri ze'a lo cacra be li xo sei la alis noi djica le nu sutra galfi le selsnu cu cusku li'u

i lu ze'a lo cacra be li pare ca le pamoi donri e le remoi donri sei le jitfa cakyrespa cu cusku i li so le cimoi e le vomoi i li xa le mumoi e le xamoi i li'oli'o li'u

i lu cinri selpla sei la alis ki'asku li'u

i lu la'e di'u krinu le nu zo CILRE cmene i jdika le ka temci kei lo cacra be li ba'e CI ca ro djedi be li ba'e RE li'u

i le sidbo cu mutce cnino la alis i abu ze'a pensi pu le nu te pinka fi lu ja'o je'upei ca le somoi donri e le panomoi donri cu zifre li'u

i lu je'u li'a go'i sei le jitfa cakyrespa li'u

i lu mo ca le papamoi donri sei la alis di'a kucli cusku li'u

i lu la'e di'u banzu sera'a le nu ckule sei le cpicinfo cu jditce tonga zunti i caku ko ta tavla lei nu kelci li'u

11 panomo'o xasyjukni vonseldansu

xasyjukni vonseldansu

i le jitfa cakyrespa cu condi vruvasxu gi'e mosra le trixe be pa le limna'i lei kanla gi'e catlu la alis gi'e troci le nu tavla i ku'i ze'a lo mentu be li paji'ire loi nu vruvasxu cu dicra le voksa i lu mintu le nu da'i lo bongu cu zunti le galxe li'u se cusku le cpicinfo i cy co'a gunka le nu desygau gi'e darxi fo le trixe ibazabo le cakyrespa cu xruti le ka se voksa kei gi'e di'a selklaku flira cusku

lu ju'ocu'i do na ze'u xabju le xamsi cnita to'i lu mi na go'i sei la alis cusku lu toi i ju'ocu'i do noroi penmi lo xasyjukni to'i la alis co'a cusku lu mi paroi vu'irga'e li'u gi'e ku'i sutra sezydicra gi'e cusku lu noroi go'i li'u toi iseki'ubo do na ka'e se xanri le nu lo xasyjukni vonseldansu cu mokau kukte li'u

i lu ie na go'i sei la alis cusku i ri mo seldansu li'u

i lu ta'a do'u sei le cpicinfo cu cusku pamai lei dansu pada se linji pa'a le xamsi korbi li'u

i lu reda sei le jitfa cakyrespa cu krixia i loi xasyge'u ku ce'o loi cakyrespa ku ce'o loi xunlabyfi'e ku ce'o dali'o ibabo ba le nu mo'u vimcu ro mivjau le jvinu li'u

i lu la'e di'u ta'e ze'u co'e sei le cpicinfo cu zunti li'u

i lu e'e reroi crakla li'u

i lu roda kansa lo xasyjukni sei le cpicinfo cu krixia li'u

i lu li'a sei le jitfa cakyrespa cu cusku i e'e reroi crakla i e'e penmi le kansa li'u

i lu e'e cajysi'u lei xasyjukni i e'e mitpoi xruti sei le cpicinfo cu di'a co'e li'u

i lu babo ju'i do'u sei le jitfa cakyrespa di'a cusku i e'e renro li'u

i lu lei xasyjukni sei le cpicinfo noi plipe le vacri cu krixia li'u

i lu le xamsi je darno bo ka'enrai li'u

i lu e'e limna jersi xy sei le cpicinfo cu krixia li'u

i lu e'e pipcarina ne'i le xamsi sei le jitfa cakyrespa cu krixia li'u

i lu e'e za'ure'u cajysi'u lei xasyjukni sei le cpicinfo cu voksa traji krixia li'u

i lu e'e xruti le tumla i mo'u pamo'i morna sei le jitfa cakyrespa noi suksa jdikygau le voksa cu cusku li'u i le re danlu noi pu ru'u plipe tai lo nu fenki kei ze'a la'e di'u cu badri je smaji tsebi'o gi'e catlu la alis

i lu ju'oda'i melbi seldansu sei la alis toldarsi cusku li'u

i lu a'upe'i do viska lo mupli sei le jitfa cakyrespa cu cusku li'u

i lu a'usai go'i sei la alis cusku li'u

i lu e'e mi'o troci le nu pamo'i morna sei le jitfa cakyrespa fi le cpicinfo cu cusku i i'i mi'o kakne secou lei xasyjukni i le mo cu sanga li'u

i lu i'e ba'e do go'i sei le cpicinfo cu cusku i mi tolmorji lei valsi li'u

i co'a junri dansu ru'u la alis i ru'inai stapa lei abu jmadegji ca le nu dukse jbikla i sligau lei xance tezu'e le nu sinxa le rilti ize'abo le jitfa cakyrespa cu masno je badri mutce sanga lu

e'o sutra doi cakcurnu i ko ti'a zgana ua pa
 xajyfi'e noi jbitrixe gi'e me mi rebla stapa
 i ui a'a ro le jukni e le respa ca se ganse
 gi'e denpa mi le canre i pei do ba kansa dansu
 i aipei naipei aipei naipei aipei do ba dansu
 i aipei naipei aipei naipei naipei do ba dansu

i do ka'enai se xanri le nu pluka co mokau
 ca le nu mi'o se renro fi le xamsi i'a au
 i dardukse i dardukse sei cy spuda toselmansa
 doi merlanu ki'e ku'i i mi na ba kansa dansu
 i ainai einai ainai einai ainai mi ba dansu
 i ainai einai ainai einai einai mi ba dansu

i na selvai le ni darno sei le pendo ze'i frati
 i iasai lo drata korbi ca'a drata mlana zvati
 i le ni darno le glico cu ni jibni be la frans
 i ko carna doi cakcurnu i ei do ba kansa dansu
 i aipei naipei aipei naipei aipei do ba dansu
 i aipei naipei aipei naipei naipei do ba dansu

li'u i lu ki'e i le nu dansu cu mutce le ka jai cinri fai le nu catlu sei la alis noi mutce gleki
 le nu uo mulno cu cusku i mi ja'asai nelci le cinri selsanga be sera'a le merlanu li'u

i lu a'a le merlanu zo'u sei le jitfa cakyrespa cu cusku my to do my pu ca'a viska li'apei
 toi li'u

i lu go'i sei la alis cusku i mi my so'iroi viska vi le sairpaln- sei abu sutra sezydicra li'u

i lu mi na djuno le du'u la sairpaln makau zvati sei le jitfa cakyrespa cu cusku i ku'i va'o
 le nu do my tai so'iroi viska kei do se slabu li'a le nu makau my jvinu li'u

i lu ia sei la alis pensi spuda le my rebla cu nenri le my moklu i my cpana loi nabyspi
 li'u

i lu do srera tu'a lei nabyspi sei le jitfa cakyrespa cu cusku i loi nabyspi cu se jisybi'o
 va'o le nu jinru le xamsi i ku'i le my rebla ja'a nenri le my moklu i krinu la'e di'u fa sei
 caku le jitfa cakyrespa cu sipcmo ke kanla ga'orgau i ko ta tavla le krinu e ro srana sei fi le
 cpicinfo cu cusku li'u

i lu krinu fa sei le cpicinfo le nu my ja'a kansa le xasyjiknu le nu dansu i seki'ubo my se
 renro fi le xamsi i seki'ubo my farlu lo darno i seki'ubo my carmi setca le rebla le moklu i
 seki'ubo my ka'enai tolsetca i uo li'u

i lu ki'e sei la alis cusku i cinri mutce i mi pu noroi djuno lo tai mutce lo merlanu li'u

i lu do'a mi do ka'e tavla lo se jmina sei le cpicinfo cu cusku i xu do djuno le du'u makau
 krinu le nu zo labyfi'e cmene le merlanu li'u

i lu mi la'e di'u noroi pensi sei la alis cusku i ma krinu li'u

i lu my kurji lei jufra e lei selsku sei le cpicinfo cu junri spuda li'u

i la alis mulno le ka se cfipu i lu uanai kurji lei jufra e lei selsku sei abu preti tonga
 rapsku li'u

i lu a'a do ma pilno le nu kurji lei do selsku sei le cpicinfo cu cusku i va'i ma cipra le ka gendra li'u

i la alis ze'a pensi pu le nu danfu i lu la jbofi'e cu go'i pe'i li'u

i lu ie la lobyfi'e i le genra ni'a le xamsi sei le cpicinfo cu di'a condi voksa cusku cu se cipra lo labyfi'e i ka'udai li'u

i lu va'o le nu da'i mi du le merlanu sei la alis noi za'o pensi le selsanga cu cusku mi cusku da'i fi le xajyfi'e fe lu fi'inai do'u e'o darsta i mi'a na djica le nu do mi'a kansa li'u li'u

i lu bilga le nu kansa sei le jitfa cakyrespa cu cusku i no clite finpe cu rivbi lo xajyfi'e li'u

i lu ue je'upe'i sei la alis spaji mutce tonga cusku li'u

i lu li'a go'i sei le jitfa cakyrespa cu cusku i mu'a va'o le nu lo finpe cu te preti fo mi kei mi cusku lu do ma friti le do xajyfi'e li'u li'u

i lu xu do skudji zo xasyvi'e sei la alis cusku li'u

i lu mi skudji le se cusku be mi sei le jitfa cakyrespa cu jgicro tonga spuda li'u i le cpicinfo cu minsku lu e'e do mi'a tavla su'o le do selfri li'u

i lu mi do ka'e tavla le mi selfri pe co'a le zi cerni sei la alis toldarsi milxe cusku i ku'i na prali fi le nu peixru le purlamdei kei i ki'ubo mi drata prenu ca py li'u

i lu ko ciksi piro la'e di'u sei le jitfa cakyrespa cu cusku li'u

i lu o'onai na go'i i pamai lei selfri sei le cpicinfo cu sutydji tonga cusku i lei velcki cu ze'u oi co'e li'u

i la alis co'a tavla fi lei abu selfri pe co'a le nu pare'u viska le blabi ractu i abu milxe le ka xanka la'e di'u kei ca le cfari i le re danlu abu mutce jibni gi'e mlana i dy ganra mutce kargau lei kanla e le moklu i ku'i abu zenba le ka darsi ca le nu ca'o co'e i lei se tirna cu prane smaaji co'u le nu abu pencu le pagbu pe sera'a le nu abu sitsku lu do tolcitno doi paf uiliam li'u le ciftoldi kei e le nu lei valsi cu fricybi'o icaku le jitfa cakyrespa cu ze'u sakyvasxu gi'e cusku lu la'e di'u mutce le ka cizra li'u

i lu traji le ka cizra fo lei cizra sei le cpicinfo cu cusku li'u

i lu roda fricybi'o sei le jitfa cakyrespa rere'u pensi cusku i mi djica le nu tirna le nu ta ca troci le nu sitsku da i ko ta skumi'e le nu co'a co'e li'u i jycy catlu le cpicinfo tai le nu jinvi le du'u cy catni la alis

i lu ko sa'irbi'o gi'e sitsku lu me le voksa be le lazni li'u sei le cpicinfo cu cusku li'u

i lu ue lei danlu cu mutce minde gi'e gasnu le nu sitsku loi selcli sei la alis pensi i mi du'i ve ckule li'u i ku'i abu sa'irbi'o gi'e co'a sitsku i ku'i le abu menli cu culno le xasyjukni vonseldansu ja'e le nu abu ja'aru'e djuno le du'u abu cusku makau i lei valsi ca'a cizra mutce barkla i lu

xasyjukni se voksa i cusku ia ti'e
 lu do mi za'o jukpa i ei gau kresi'e
 li'u gi'e zbipilno le nu vo'a cnici
 le ka dasri joi batke e ro si'a vrici

i ca le nu le canre cu sudga ku cmila

gi'e tavla co ckasu brafi'e se cfla
 i ii ku'i ca le nu le xamsi cu banro
 kei le voksa cu binxo lo sance tolkanro

i lu di'u frica le ta'e se cusku be mi bei ca le nu mi verba sei le cpicinfo cu cusku li'u
 i lu ju'a mi di'u pu noroi tirna sei le jitfa cakyrespa i ku'i simlu le ka nalfadni nonselsmu
 li'u

i la alis noda cusku gi'e ca'o zutse to le flira cu se sarju le xance toi gi'e kucli le du'u
 xukau ca de ba za'ure'u rarna fasnu

i lu mi djica le nu mi te ciksi sei le jitfa cakyrespa li'u

i lu ta ka'enai ciksi sei le cpicinfo cu sutra cusku i e'e di'a co'e le jersi pempau li'u

i lu ku'i lei batke xu sei le jitfa cakyrespa cu za'o co'e i ta'i ba'e ma pilno le nazbi le nu
 cnici li'u

i lu pamoi be lei nundansu stapa sei la alis cusku li'u i ku'i abu mutce se cfipu piro le
 cuntu gi'e djica le nu le selsnu cu cenba

i lu e'e di'a co'e le jersi pempau sei le cpicinfo rere'u naldenpa cusku i co'a co'e lu mi
 pagre le purdi li'u li'u

i la alis na darsi le nu na tinbe i abu birti le du'u ba srera barkla gi'e di'a desku voksa
 cusku lu

mi pagre le purdi i i'e se funjdi
 i le ctepci le tixu vi kansa lo nuncti
 i ty le se snuji e ia le te snuji
 cu citka ca le nu cy cpacu le smuci

i ba le nu mulno uo kei cy te dunda
 le palta noi ke'a sy ka'e se tunta
 i ca le nuncabna le tixu cu brejbi
 le nu pilno le dakfu –

i lu ma prali fi le nu sitsku ro di'u sei le jitfa cakyrespa cu zunti va'o le nu do na ca'o
 ciksi i traji le ka cfipu kei fo lei mi se tirna li'u

i lu go'i i pe'i ei sisti sei le cpicinfo li'u i la alis mutce le ka gleki le nu tai zukte

i lu e'upei mi'a troci lo drata morna be fi le xasyjukni vonseldansu sei le cpicinfo cu di'a
 co'e iji aupei le jitfa cakyrespa cu sanga da do li'u

i lu a'e e'o sanga pe'u doi jitfa cakyrespa sei la alis spuda li'u i le nu abu tai sutra spuda
 cu rinka le nu le cpicinfo cu cusku sepi'o lo jgicro tonga lu i'a ka'enai jimpe le nu makau da
 pluka i ko sanga lu cakyrespa stasu li'u ta vau aipei doi slabu li'u

i le jitfa cakyrespa cu condi vruvasxu gi'e co'a sanga di'e sepi'o lo voksa noi so'oroi dicra

melbi bo stasu ricfu je crino
 denpa fi lo vaurecino
 i pronalka'e kukselzbasu
 stasu co vanci melbi bo stasu

stasu co vanci melbi bo stasu
 me-elbi bo sta-asu
 me-elbi bo sta-asu
 sta-asu co va-a-anci
 melbi bo melbi bo stasu

melbi bo stasu i roda kecti
 le re'ucti ja fi'ecti
 i no da xanka le nu ckasu
 da le nu djica le melbi bo stasu
 da le nu djica le melbi bo stasu
 me-elbi bo sta-asu
 me-elbi bo sta-asu
 sta-asu co va-a-anci
 melbi bo melbi – BO STAsu

i lu e'e rapli sei le cpicinfo cu krixu li'u i le jitfa cakyrespa puzi co'a rere'u sanga ca le nu lo selkrixu no'u lu le nunpai cu cfari li'u darno se tirna

i lu e'e sei le cpicinfo cu krixu li'u i cy jgari la alis fo le xance gi'e sutra cliva gi'e na denpa le nu mo'u sanga

i lu le nunpai cu mo sei la alis vaxyselhandu cusku ca le nu bajra i ku'i le cpicinfo cu spuda lu e'e li'u po'o gi'e sutyze'a bajra ca'o le nu bleze'a to se bevri le brife poi jersi vo'a toi fa lei badri valsi po'u di'e

sta-asu co va-a-anci
 melbi bo melbi bo stasu

12 papamo'o ma zerle'a lei rutytisna

papamo'o ckupau
ma zerle'a lei rutytisna

i le risna noltrunau e le risna noltruni'u cu zutse le vo'a nolstizu ca le nu toleliva i lo barda premei cu jmaji le sruri i ro klesi be lei cmalu cipni joi danlu be'o e ji'a le karda romei i le nolse'u cu sanli ca'u le remei gi'e se rinju lo linsi gi'e jbini lo sonci remei noi fanta i jibni le noltrunau fa le blabi ractu noi jgari nu'i ge lo tabra lo xance gi lo skapi te ciska clanu le drata i satci midju le kumfa fa lo jubme noi se cpana lo barda palne be loi rutytisna noi tai xamgu se jvinu ja'e le nu la alis xagji ri'a le nu catlu i lu au mulgau le nunpai sei abu pensi gi'e fairgau le cidja li'u i ku'i la'e di'u simlu le ka na lakne i seki'ubo abu co'a catlu ro sruri be abu tezu'e le nu le temci cu canlu

i la alis pu noroi zvati lo nunpai kumfa gi'e ku'i pu ca'a tcidu lo srana be ky loi cukta gi'e se pluka le nu facki le du'u djuno le du'u makau cmene so'a zvati i lu ta pajni sei abu sezysku ki'u le nu ta dasni lo barda krebasti li'u

i ta'o le pajni cu du le noltrunau noi dasni le nolmapku nega'u le krebasti to ko catlu le craxra va'o le nu do djica le nu viska le nu dasni ta'i makau toi gi'enaisai simlu le ka kufra i ju'o na melbi mapti

i lu ta pairkamni tsina sei la alis pensi i lei va pare danlu to ei abu cusku zo danlu ki'u le nu ge su'o dy mabru gi su'o dy cipni toi cu pe'i pairkamnycmi li'u i abu rejji'icroi cusku le romoi valsi gi'e jgira mutce ki'u le nu jinvi to drani toi le du'u so'usai cmalu nixli le me abu moi cu djuno le du'u makau smuni i ku'i zo paicmi ji'a mapti banzu

i ro le pare pairkamnycmi cu zuktce ciska fi lo tanbo i lu tu ma zukte sei la alis fi le cpicinfo cu tolylau cusku i noda kakne le nu tu ciska kei pu le nu le nunpai cu cfari li'u

i lu tu ciska le tu cmene sei le cpicinfo cu tolylau spuda ki'u le nu terpa le nu tolmorji pu le nu le nunpai cu tolfari li'u

i lu ue bebna sei la alis co'a cladu je fengu voksa cusku li'u i ku'i abu sutra sisti ki'u le nu le blabi ractu cu krixu lu ei smaji bu'u le kumfa li'u i le noltrunau co'a dasni le visteci gi'e xanka catlu le sruri tezu'e le nu facki le du'u makau tavla

i la alis ka'e viska to xamgu tai le nu abu catlu ga'u le janco toi le nu ro le pairkamnycmi cu ciska lu ue bebna li'u le py tanbo kei gi'eji'asai ka'e tilvi'a le nu paboi py na se slabu lei lerfu pe zo bebna gi'e nitcu le nu cpedu le nu jungau kei le lamji i lu ba melbi kalsa fa lei tanbo pu le nu le nunpai cu mulno sei la alis pensi li'u

i pa le pairkamnycmi cu pilno lo pinsi noi vrumli cupra i li'a la alis na ka'e renvi la'e di'u gi'e klama fo le sruri be le kumfa gi'e ti'erbi'o py gi'e bazi kakne le nu lebna le pinsi py i abu tai sutra ja'e le nu le sellecti ke cmalu pairkamnycmi no'u la bil po'u le rebyrespa na ka'e facki le du'u le pinsi makau binxo .isemu'ibo by. xa'o ve'u sisku tu'a py. gi'e bilga le nu ciska sepi'o lo degji ze'a le djedi velvi'u i la'e di'u tolmutce le ka prali kei ki'u le nu noda seja'e barna le tanbo

i lu doi noisku ko tcidu le se zerxu'a sei le noltrunau cu cusku li'u

i caku le blabi ractu cu ciroi tolsakci le tabra gi'e tolgurgau le skapi te ciska slanu gi'e tcidu bacru di'e

le noltruni'u pe le risna cu zbakukte loi rutytisna

ze'a lo crisa djedi
 i le nols'e'u pe le risna cu zerle'a loi rutytisna
 gi'e darbevri bredi

i lu ko pensi le do se pajdi sei le noltrunau fi le pairkamni cu cusku li'u
 i lu ei za'o na go'i i ei za'o na go'i sei le ractu cu sutra zunti i ei lo mutce cu purci la'e di'u li'u
 i lu ko klagau le pamoi datnydu'a sei le noltrunau cu cusku li'u i le blabi ractu cu ciroi tolsakci le tabra gi'e krixa lu ju'i pamoi datnydu'a li'u
 i le pamoi datnydu'a cu du le mapypre noi nerkla gi'e jgari nu'i ge lo tcati kabri lo xance gi lo nanba joi matne le drata i lu ko mi fraxu doi nolba'i sei my co'a co'e le nu mi ti nerbevri i ku'i mi na mo'u pinxe le tcati ca le nu mi se klagau li'u
 i lu ei do mo'u co'e sei le noltrunau cu cusku i ca ma do co'a co'e li'u
 i le mapypre cu catlu le cibmasti cicyractu noi pu klaje'i my le kumfa gi'e kansa le sipsmacu i lu le pavomoi be le cibmasti pe'i sei cy cusku li'u
 i lu pamumoi sei le cibmasti cicyractu cu cusku li'u
 i lu paxamoi sei le sipsmacu cu jmina li'u
 i lu ko ciska la'e di'u sei le noltrunau fi le pairkamni cu cusku li'u i le pairkamni cu sutra ciska le ci detri le py tanbo gi'e simsumji dy gi'e galfi le danfu lo rupnu joi fepni
 i lu ko vimcu le do mapku sei le noltrunau fi le mapypre cu cusku li'u
 i lu ti na me mi moi sei le mapypre cu cusku li'u
 i lu zerle'a sei le noltrunau fa'a le pairkamni cu ki'asku li'u i py zi notci'a le fatci
 i lu mi ti vecnu sei le mapypre cu jmina ciksi i mi noti ponse i mi mapypre li'u
 i caku le noltruni'u co'a dasni le vistci gi'e co'a ze'a catlu le mapypre noi labybi'o gi'e xanka tarti
 i lu ko dunda le do datni sei le noltrunau cu cusku i ko na xanka ija mi da do zivi catrymi'e li'u
 i la'e di'u nasai simlu le ka darsygau le datnydu'a noi za'o slilu fi le nu sanli fi lo jamfu ku fa'u le drata kei gi'e xanka catlu le noltruni'u gi'e se cfipu batyvi'u lo barda spisa le tcati kabri ne seba'i le nanba joi matne
 i caku la alis ganse lo cizra noi cfipu abu co'u le nu facki le du'u makau fasnu i abu ca'o co'a za'ure'u barda banro gi'e pamai jdice le nu cliva le kumfa kei gi'e ku'i remai jdice le nu stali ze'a le nu le canlu cu banzu
 i lu au do na tai catke sei le sipsmacu noi zutse lamji abu cu cusku i mi ka'eru'e vasxu li'u
 i lu mi ka'enai rivbi sei la alis cumla cusku i mi ca'o banro li'u
 i lu ei do na vi banro sei le sipsmacu cu cusku li'u
 i lu ko na bebna tavla sei la alis darsyze'a cusku i ju'o do ji'a ca'o banro li'u
 i lu go'i i ku'i mi banro sekai lo ka racli sutra sei le sipsmacu cu cusku i na tai ckasu go'i li'u i sy tolgei mutce sa'irbi'o gi'e pagre le kumfa le drata fanmo
 i ze'a la'e di'u le noltruni'u noroi sisti le nu catlu le mapypre kei gi'e cusku ca le nu le sipsmacu cu pagre le kumfa kei fi pa le nunpai pulji lu ko bevri le liste be lei sanga pe le romoi ke zgike se tigni li'u i le mapypre cu tai desku ja'e le nu le re cutci cu nalseldasybi'o

i lu ko dunda le do datni sei le noltrunau rere'u fengu cusku ija do te catrymi'e gi'u xanka li'u

i lu mi pindi doi nolba'i sei le mapypre cu co'a desku voksa cusku i mi puzi co'a pinxe le mi tcati to zi lo jetfu be li su'eji'ipa toi i le nanba joi matne ca'o cinlybi'o i le tcati cu slilu li'u

i lu le mo cu slilu sei le noltrunau cu cusku li'u

i lu co'a le tcati sei le mapypre cu spuda li'u

i lu li'a sei le noltrunau cu kinli cusku i xu do jinvi le du'u mi bebna i e'e di'a co'e li'u

i lu mi pindi sei le mapypre cu di'a co'e i so'eda cu slilu ba la'e di'u i ku'i le cibmasti cicyractu cu cusku li'u

i lu mi na go'i sei le cibmasti cicyractu cu sutra zunti li'u

i lu do ja'a go'i sei le mapypre cu cusku li'u

i lu mi na'erxu'a sei le cibmasti cicyractu cu cusku li'u

i lu ta na'erxu'a sei le noltrunau cu cusku i ko tolju'i le di'u pagbu li'u

i lu no'i le sipsmacu cu cusku sei le mapypre cu di'a co'e li'u i my xanka ke sruri catlu tezu'e le nu zgana le nu xukau sy ji'a na'erxu'a i ku'i sy na'erxu'a noda gi'e carmi sipna

i lu baku sei le mapypre cu di'a cusku mi za'ure'u katna lo nanba joi matne li'u

i lu ku'i le sipsmacu ma cusku sei pa le pairkamnycmi cu te preti li'u

i lu mi ri na morji sei le mapypre cu cusku li'u

i lu ei do morji sei le noltrunau cu notsku ija mi da do catrymi'e li'u

i le sellecti mapypre cu falcru le tcati kabri e le nanba joi matne gi'e sanli fi pa le cidni i lu mi pindi doi nolba'i sei my co'a co'e li'u

i lu do pindi le ka tavla certu sei le noltrunau cu cusku li'u

i caku pa le smacrkobaiu cu geirki'a gi'e bazi se rinju lei nunpai pulji to zo rinju cu rufsu valsi i mi ciksi le nu ta'i makau zakte i py ponse lo barda ke bukpu dakli noi ka'e ganlo sepi'o loi dasri i py le smacrkobaiu cu setca dy gi'e zutse toi

i lu mi gleki le nu mi viska la'e di'u sei la alis pensi i mi so'iroi tcidu fi loi karni ca le mu'o nunpai lu troci le nu xanvruzau noi bazi se rinju lei nunpai pulji li'u gi'e pu noroi jimpe le du'u makau smuni li'u

i lu e'a va'o le nu la'e di'u cu piromei le do se djuno be fi le cuntu kei do nitkla sei le noltrunau cu di'a cusku li'u

i lu mi ka'enai klama lo nitmau sei le mapypre i mi cpana le loldi li'u

i e'a va'o la'e di'u do nitytse sei le noltrunau cu spuda li'u

i caku le drata smacrkobaiu cu geirki'a gi'e se rinju

i lu a'u mo'u smacrkobaiu sei la alis pensi i caku mi'a xagmau li'u

i lu mi zmanei le nu mo'u tcati pinxe sei le mapypre cu cusku li'u i my xanka catlu le noltruni'u noi tcidu le liste be lei sanga

i lu e'a klama sei le noltrunau cusku li'u i le mapypre cu sutra cliva le kumfa secou le nu denpa ji'asai le nu dasni lei cutci

i lu ije ko le stedu tu vimcu bu'u le bartu sei le noltruni'u fi pa le pulji cu jmima cusku li'u i ku'i le mapypre na ka'e se viska pu le nu le pulji cu tolcliva le vorme

i lu ko klagau le jersi datnydu'a sei le noltrunau cu cusku li'u

i le jersi datnydu'a du le jukpa pe le noltroni'u i jy jgari le tsaprpiperi tanxe le xance i la alis cu smadi le du'u du makau kei pu le nu jy klama le kumfa kei ki'u le nu ro le prenu poi jibni le vorme cu co'a senci

i lu ko dunda le do datni sei le noltrunau cu cusku li'u

i lu na go'i sei le jukpa cu cusku li'u

i le noltrunau cu xanka catlu le blabi ractu noi tolylau voksa cusku lu ei le nolba'i cu lalmu'o le vi datnydu'a li'u

i lu i'a o'o i'a sei le noltrunau cu togleki li'u i ba le nu kucysingau lei birka gi'e frumu fa'a le jukpa co'u le nu le ny kanla cu jibni le nu na ka'e se viska cu condi voksa cusku lu ma te zbasu loi rutytisna li'u

i lu lo tsaprpiperi ra'u sei le jukpa cu cusku li'u

i lu lo satyjisra sei lo sipna voksa noi trixe jy cu cusku li'u

i lu ko selkarlygau le va sipsmacu sei le noltruni'u cu krixia i ko le stedu ta vimcu i ko ta barklagau le kumfa i ko ta rinju i ko ta tunta i ko le zbikre cu vimcu li'u

i ze'a lo mentu be li so'o le kumfa cu kalsa ca'o le nu le sipsmacu gau barkla i ca le nu cnici xruti kei le jukpa ba'o canci

i lu na vajni sei le noltrunau cu surla mutce cusku i ko klagau le jersi datnydu'a li'u i ny tolylau tonga jmina cusku fi le noltruni'u fe lu i'u doi dirba ei ba'e do lalmu'o le jersi datnydu'a i le nu go'i cu mutce corgau mi le sedycra li'u

i la alis cu catlu le blabi ractu noi juxre co'e le liste ge'u gi'e mutce kucli le du'u le jersi datnydu'a cu mokau i lu za'o na mutce le ka datni sei abu sezysku li'u i uedaisai le blabi ractu sepi'o le kinli je emalu voksa cu bacru tcidu le emene po'u zo alis

13 paremo'o le sidydatni po'e la alis.

paremo'o ckupau

le sidydatni po'e la alis.

i lu mi zvati sei la alis krixa li'u i abu ze'i tolmorji le nu lo mokau barda cu se banro ze'a le puzi mentu be li so'u i abu tai sutra plipe ja'e le nu falgau le pairkamni tsina sepi'o le skaci korbi gi'e renro ro le pairkamnycmi lei stedu be le cnita premei i lei pairkamnycmi cu kalsa preja i la'e di'u morjygau la alis le nu abu se snuti le nu falgau lo slofi'e tanxe ca le purlamjeftu

i lu u'u i e'osai ko mi fraxu sei abu dunku tonga ki'asku li'u i abu co'a crepu lei pairkamnycmi le loldi rai le ka sutra kei ki'u le nu le slofi'e snuti za'o se canlu le abu menli i abu tolsatci cu te sidbo fi le du'u ga eikau crepu gi'e punji py le pairkamni tsina gi py ba mrogau

i lu le nunpai na ka'e di'a fasnui sei le noltrunau cu junri mutce voksa cusku pu le nu ro le pairkamnycmi cu xruti le drani selzva i ba'e ro sei ny rere'u basna mutce cusku li'u i ny catlu la alis ca le nu cusku

i la alis catlu le pairkamni tsina gi'e viska le nu abu pu punji seja'e le nu sutra kei le rebyrespa ja'e le nu le ry stedu cu cnita i le se kecti cu sligau le rebla ta'i lo nu tolgei kei gi'e ka'enaisai muvdu i abu ry bargau gi'e drani punji i lu na mutce le ka vajni sei abu sezysku i pe'i le fatne le se fatne cu dunli le ka prali le nunpai li'u

i ca le nu ge le pairkamni cu ba'oru'e xruti fi le jenca po'u le nu se dicra gi le tanbo e le pinsi cu se tolcirko gi'e se dunda fi py kei py co'a tolylazni ciska lo lisri be le fasnui i go'i fa ropy po'u na'e bo le rebyrespa noi simlu le ka dukse le ka se sfasa kei le nu zunkte lo drata be le nu kalri moklu zutse gi'e gapru catlu le drudi be le kumfa

i lu do ma djuno le cuntui sei le noltrunau fi la alis cusku li'u

i lu noda sei la alis cusku li'u

i lu xu nosai da sei le noltrunau cu za'o co'e li'u

i lu nosai da sei la alis cu cusku li'u

i lu la'e di'u cu mutce le ka vajni sei le noltrunau fa'a le pairkamni cu cusku li'u i py co'a ciska di'u le tanbo ca le nu le blabi ractu cu zunti i lu li'a zo tolvajni cu se skudji do doi nolba'i sei ry sinma mutce tonga cusku li'u i ku'i ry frumu gi'e flira snigau ca le nu tavla

i lu li'a mi skudji zo tolvajni sei le noltrunau cu sutra cusku li'u i ny ca'o tolylau sezycusku lu vajni i tolvajni i tolvajni i vajni li'u tai le nu troci le nu le mo valsi cu xagtau fi le ka sance

i so'o le pairkamnycmi cu ciska zo vajni i so'o py zo tolvajni i la alis ka'e viska ki'u le nu jibni banzu le nu catlu lei py tanbo i lu ku'i nasai vajni sei abu pensi sezysku li'u

i caku le noltrunau noi pu ze'a zunkte ciska le ny notci cukta cu cusku lu ei smaji li'u gi'e bacru teidu fi cy fe lu le voremoi javni zo'u ei ro prenu poi galtu minli li za'upa cu cliva le kumfa li'u

i roda catlu la alis

i lu mi na galtu minli li pa sei la alis cusku li'u

i lu do go'i sei le noltrunau cu cusku li'u

i lu go'i li ji'ire sei le noltruni'u cu jmina li'u

i lu iseju ainai mi cliva sei la alis cuski iji'a jy na fadni javni i do jy cazi finti li'u
 i lu jy tolcitrai lei javni pe le cukta sei le noltrunau cu cusku li'u
 i lu va'o la'e di'u jy pamoi ei sei la alis cusku li'u
 i le noltrunau cu labybi'o gi'e sutra polje le notci cukta i lu ko pensi le do se paijdi sei
 le noltrunau fi le pairkamni cu dizlo je desku voksa cusku li'u
 i lu lo drata velji'i cu za'o ba se jarco pe'u doi nolba'i sei le blabi ractu noi sutra plipe
 cu cusku i le vi pelji puzi se cpacu li'u
 i lu ma se ciska fi ta sei le noltruni'u cu cusku li'u
 i lu mi ti za'o na kargau sei le blabi ractu cu cusku i ku'i ti simlu le ka xatra fi le pinfu
 fe y da li'u
 i lu ju'o go'i sei le noltrunau cu cusku ijonai ti xatra noda i ku'i ka'u le nu xatra noda
 cu rirci li'u
 i lu ma se judri sei pa le pairkamnycmi cu cusku li'u
 i lu nasai se judri sei le blabi ractu cu cusku i je'u no da se ciska fi le bartu li'u i ry tolplo
 le pelji ca le nu tavla gi'e jmina lu pa'e ti na xatra i ti penpau selcmi li'u
 i lu xu le ciska tarmi cu me le pinfu moi sei lo drata pairkamnycmi cu te preti li'u
 i lu na go'i sei le blabi ractu cu cusku i la'e di'u cu traji le ka cizra li'u i to ro le
 pairkamnycmi cu simlu le ka se cfipu toi
 i lu ja'o py fukygau fi le ciska tarmi pe lo drata sei le noltrunau cu cusku li'u i to ro le
 pairkamnycmi cu xruti le ka cikygei toi
 i lu pe'u doi nolba'i sei le nelse'u cu cusku mi tu na ciska i ji'a no da ka'e je'urja'o le
 du'u mi ja'a go'i i no cmene cu zvati le fanmo be tu li'u
 i lu va'o le nu do na ciska le do cmene kei sei le noltrunau cu cusku le cuntu cu xlaze'a i
 ba'e ju'o do zukte fi le nu palci inaja do ne tai lo stace pu ciska le do cmene li'u
 i kampu fa le nu xanvruzau la'e di'u noi cabdei pamoi lei tolbebna selsku be le noltrunau
 i lu la'e di'u cu jetyja'o le du'u ta zerzu'e sei le noltruni'o cu cusku li'u
 i lu la'e di'u cu jetyja'o noda poi simsa sei la alis cusku i ua do na djuno ji'asai le du'u
 makau se ciska li'u
 i lu ko tcidu sei le noltrunau li'u
 i le blabi ractu co'a dasni le vistci i lu ei mi go'i co'a ma pe'u doi nolba'i sei ry retysku
 li'u
 i lu co'a le cfafanmo sei le noltrunau cu junri cusku ko ca'o go'i co'u le tolcfafanmo icaku
 ko sisti li'u
 i di'e penmi co se tcidu le blabi ractu

i ti'e do ta klama ca'a
 i do ti tavla mi
 i cu'u ta ge mi preza'a
 ginai mi limna di

i mi pu nalkla i vlabe'i
 to mi'o djuno toi

i ganai lanli le selte'i
 gi ma do dimna oi
 i mi pa de i re di ko'e
 i do su'o ci da
 i do se xruti ro le co'e
 noi me mi moi pu za

i lu la'e di'u cu vajrai lei datni poi se tirna ca le cabdei sei le noltrunau noi xance simyosra cu cusku i seki'ubo ei le pairkanmi li'o li'u

i lu va'o le nu py ka'e ciksi di'u kei sei la alis cusku to abu cu banro lo tai barda ze'a le puzi mentu be li so'u ja'e le nu abu nasai terpa le nu zunti ny toi mi dunda lo rupnu py i ba'e mi na jinvi le du'u lo selci ji'asai di'u smuni li'u

i ro le pairkamnycmi cu ciska fi le tanbo fe lu ba'e ta na jinvi le du'u lo selci ji'asai di'u smuni li'u gi'enai ku'i troci le nu ciksi le pelji

i lu le nu noda smuni la'e di'u sei le noltrunau cu cusku cu fanta lo barda raktu ki'u le nu einai mi'a troci le nu facki lo smuni i ku'i ju'ocu'i sei ny noi ke'a lei penpau cu pejgau le cidni gi'e catlu sepi'o pa kanla di'a co'e i pe'i mi viska lo smuni i lu nai mi limna di li'u i ju'i do'u je'upei do ka'enai limna di sei ny fa'a le nolsek'u cu jmina li'u

i le nolsek'u cu badri daskygau le stedu i lu xu mi simlu le ka ka'e go'i sei ny cusku li'u to ju'osai ny noi marji lo jarple na simlu toi

i lu i'e sei le noltrunau cu cusku li'u i ny di'a tolylau bacru lei penpau i lu lu to mi'o djuno toi li'u mapti li'a le pairkamni i lu i mi pa de i re di ko'e li'u i ua ju'o la'e di'u nu ta fairgau lei rutytisna li'u

i lu ku'i se jersi lu i do se xruti ro le co'e li'u sei la alis cusku li'u

i lu ua ta zvati sei le noltrunau noi jarco lei rutytisna noi cpana le jubme cu jinga cusku i noda ka'e klimau la'e di'u i ku'i lu pu le nu ta fengu tarti li'u i do noroi fengu tarti doi dirba pe'i je'upei sei ny fi le noltruni'u cu cusku li'u

i lu noroi sei le noltruni'u cu fengu mutce cusku li'u i ny renro lo xinmo vasru le rebyrespa ca le nu tavla i to la bil uu pu de'a ciska fi le tanbo sepi'o lo degji mu'i le nu dy na mornygau i ku'i ry sutra di'a co'e sepi'o le xinmo noi carvi le ry flira ku'o ze'a le nu xy renvi toi

i lu seki'ubo lei valsi do na mapti sei le noltrunau cu cusku li'u i ny cisma catlu le sruri i morsi smaji

i lu mi pu vlakei sei le noltrunau cu jgicro tonga jmina li'u i roda cmila i lu e'i le pairkamni cu pensi le se pajjdi sei le noltrunau ji'irenore'u le djedi cu cusku li'u

i lu na go'i i na go'i sei le noltruni'u cu cusku i le se sfami'e cu pamoi i le se pajjdi cu za'umoi li'u

i lu bebna je nalprije sei la alis cladu cusku i ionai oi pamoi fa le se sfami'e li'u

i lu ko ri'urgau le do tance sei le noltruni'u noi zirpu binxo cu cusku li'u

i lu ai mi na go'i sei la alis cu cusku li'u

i lu ko le stedu ta vimcu sei le noltruni'u cu voksa launrai krixia li'u i no da movdu

i lu ma do terpa sei la alis noi ca ba'o banro le abu tcaci barda cu cusku i ga'i do na'e drata lo kardyme li'u

i caku le karda romei cu tolfarlu le vacri gi'ebabo farlu la alis i abu milxe krixia ri'a lo se xadba be le nunterpa e le nunfengu gi'e troci le nu rivbi ky kei gi'e facki le du'u abu vreta

le rirxe korbi fau le stedu cu cpana le tuple be le mensi noi xendo vimcu loi morsi pezli noi ba'o farlu le abu flira lei tricu

i lu ko cikna doi dib alis sei le mensi cu cusku i ue do ze'u sipna li'u

i lu u'e mi senva lo tai cizra sei la alis cusku li'u i abu tavla le mensi ro le abu cizra selylifri poi do puzi ca'o tcidu ke'a i ca le nu mo'u go'i kei le mensi cu cinba abu gi'e cusku lu je'u ju'o cizra se senva doi dirba i ku'i ko ca bajra klama tu'a le tcati i ca'o lerci binxo li'u i la alis sa'irbi'o gi'e bajra gi'ecabo pensi to drani toi le du'u le se senva cu se manci

i ku'i le mensi cu zutse za'o le nu abu cliva kei gi'e vregau le stedu le xance gi'e catlu le nu le solri cu farlu kei gi'e pensi le cmalu no'u la alis ge'u e ro le abu se manci se lifri i le mensi ji'a co'a senva sa'enai i senva la'e di'e

i pamai my senva la alis i lei abu cmalu xance cu za'ure'u ca'o jgari le my cidni i lei abu carmi selci'i kanla cu catlu lei me my moi i my ka'e tirna le satci tonga be fi le abu voksa gi'e viska le cizra nu stedu desku noi se rinju le kerfa le nu gacri lei kanla i ca le nu my tirna gi'a simlu le ka tirna cu jmive binxo ru'usai my fa le cizra zukte pe le se senva be le my cmalu mensi

i le clani srasu cu vruvricypra bu'u lei my jamfu ca le nu le blabi ractu cu sutra klama i le terpa smacu cu jacre'o pagre le jibni la'ucma i my tirna le sance be lei tcati kabri ca le nu le cibmoimasti cicyractu cu kansa lei cicy pendo le ze'e nu sanmi i le cpina voksa be le noltruni'u cu minde lei ny malselfu'a vitke le nu se catra i le xarju cifnu cu za'ure'u senci fi'o cpana le cidni be le noltroni'u ca le nu loi palta ku joi loi palne cu sruri porpi i za'ure'uku le selkrixa be le cpicinfo be'o e le vrumli pe le tanbo pinsi pe le rebyrespa ge'u ge'u e le se zunva'u be lei smacrkobaiu cu se tisna le vacri gi'e jorne le darno kaksna be le tolgeitce ke jitfa cakyrespa

i my za'o zutse to lei kanla cu ganlo toi gi'e xadba krici le du'u my zvati le selmacygu'e kei gi'eku'i djuno le du'u le nu kargau ky cu banzu le nu roda binxo le tolzdi fatci i le srasu cu vruvricypra gau le brife i le la'ucma cu se boxna gau lei jauspa i le sance be lei tcati kabri cu binxo le se lanjanbe i le cpina se krixa be le noltruni'u cu go'i le voksa be le lankurji nanla i le nunsenci be le cifnu be'o e le selkrixa be le cpicinfo be'o e ro le drata ke cizra savru cu binxo sei my djuno le mixre sance be le zukcfu cange i le se cmoni be lei zu bakni cu basti lei tilju kaksna be le jitfa cakyrespa

i romai my se xanri le nu le my cmalu mensi ca le balvi cu makcu ninmu gi'e ralte ze'a lei makcu nanca le sampu je prami risna pe le vercedra gi'e jajgau le cymy cmalu panzi gi'e gasnu le nu lei ba'e py kanla cu carmi se cinri so'i cizra lisri e ju'ocu'i ji'asai le se senva pe le puzu selmacygu'e kei gi'e kansa cinmo lei py sampu se tolgei gi'e se pluka lei py sampu se gleki gi'e morji le cymy verba nunji'e e lei selgei ke crisa djedi

FA'O